

清

史

稿

清史稿

儒林傳三

馬宗榘

子 瑞辰

三 號

張惠言

子 咸熙

江 承之

郝懿行

陳壽祺

子 壽祺

何 治運

許宗彥

呂飛鵬

沈 夢龍

宋 貴華

嚴可均

康 元鼎

焦 循

子 循

顧 鳳毛

李富孫

兄 維祺

弟 廷樞

胡承琪

胡 秉直

朱 恩

凌 曙

歸 傳均

劉逢祿

宋 翔鳳

嚴 望

雷學淇

從 述

子 寶齡

胡培翬

楊 大城

劉文淇

子 駿傑

孫 寶曾

方 申

王 筠

曾 釗

林 伯綱

李 嗣年

柳興恩

從 弟 文榮

弟 許 觀

陳 澧

從 弟 澧

從 弟 澧

杜 文燾

鄭 珍

弟 寶勳

王 筠

劉寶楠

子 寶楠

龍啓瑞

直隸 順大 舉

陳立

陳奐

金 興

黃式三

子 以 周

俞樾

鎮 文 虎

王闈運

王先謙

孫詒讓

鄭 杲

宋 壽 升  
法 學 堂

馬宗榘字器之桐城人由舉人官東流縣教諭嘉慶六年成進士又一年卒少從舅氏姚鼎學詩古文詞所作多沈博絕麗既而精通古訓及地理之學鄉舉時以解論語過位升堂合於古制大興朱珪亟拔之後從邵晉涵任大樞王念孫遊其學益進嘗以解經必先通訓詁而載籍極博未有彙成一編者乃偕同志孫星衍阮元朱錫庚分韻編錄適南旋中輟其後元視學江浙萃諸名宿爲經籍纂詁其凡例猶宗榘所手訂也生平敦實寡嗜好惟以著述爲樂嘗撰左氏補注三卷博徵漢魏諸儒之說不苟同立異所著別有毛鄭詩詁訓考證周禮鄭注疏證穀梁傳疏說文字義廣證戰國策地理考南海鬱林合浦蒼梧

四郡沿革考嶺南詩鈔共數十卷校經堂詩鈔二卷子瑞辰字元伯嘉慶十五年進士選翰林院庶吉士散館改工部營繕司主事擢郎中因事罷誤發盛京效力旋賞主事奏留工部補員外郎復坐事發往黑龍江未幾釋歸歷主江西白鹿洞山東嶧山安徽臨陽書院講席髮逆陷桐城衆驚走賊脅之降瑞辰大言曰吾前翰林院庶吉士工部都水司員外郎馬瑞辰也吾命二子團練鄉兵今仲子死少子從軍吾豈降賊者耶賊執其髮爇其背而擁之行行數里罵愈厲遂死年七十九事聞卹廕如例敕建專祠瑞辰勤學著書毫而不倦嘗謂詩自齊魯韓三家既亡說詩者以毛詩爲最古據鄭志答張逸云注詩宗毛爲主毛義隱略則更表明是鄭君大旨本以述毛其箋詩改讀非盡易傳而正義或誤以爲毛鄭異義鄭君先從張恭祖受韓凡箋訓異毛者多本韓說其答張逸亦云如有不同卽下己意而正義又或誤合傳箋爲一毛詩周古文其經字多假借類皆本於雙聲疊韻而正義或有未達於是乃撰毛詩傳箋通釋三十二卷以三家辨其異同以全經明其義例以古音古義證其闕互以雙聲疊韻別

其通借篤守家法義據通深同時長洲陳奐著毛詩傳疏亦爲專門之學由是  
治毛詩者多推此兩家之書子三俊字命之優貢生舉孝廉方正學宗程朱以  
國難家仇憤欲殺賊四年六月率練勇追賊至周瑜城力戰死年三十五著有

馬徵君遺集

張惠言字臬聞武進人少受易經即通大義年十四爲童子師修學立行敦禮  
自守人皆稱敬嘉慶四年進士時大學士朱珪爲吏部尙書以惠言學行特奏  
改庶吉士充實錄館纂修官六年散館改部屬珪復特奏授翰林院編修七年  
卒年四十有二惠言鄉會兩試皆出朱珪門未嘗以所能自異默然隨羣弟子  
進退而已珪潛察得之則大喜故屢進達之而惠言亦斷斷相諍不敢隱珪言  
天子當以寬大得民惠言言國家承平百年餘至仁涵育遠出漢唐宋之上吏  
民習於寬大故姦孽萌芽其間宜大伸罰以肅內外之政珪言天子當優有過  
大臣惠言言庸狃之輩倖致通顯復壞朝廷法度惜全之當何所用珪喜進淹  
雅之士惠言言當進內治官府外治疆場者與同縣洪亮吉於廣坐諍之惠言

少爲詞賦擬司馬相如揚雄之文及壯又學韓愈歐陽修篆書初學李陽冰後學漢碑額及石鼓文嘗奉命詣盛京篆列聖加尊號玉寶惠言言於當事謂舊藏寶不得磨治又謂翰林奉命篆列聖寶宜奏請馳驛以格於例不果行生平精思絕人嘗從歛金榜問故其學要歸六經而尤深易禮著有周易虞氏義虞氏消息序曰自漢武帝時劉向校書考易說以爲諸易家皆祖田何楊叔丁將軍大義略同惟京氏爲異而孟喜受易家陰陽其說易本於氣而後以人事明之八卦六十四象四正七十二候變通消息諸儒祖述之莫能具當漢之季年扶風馬融作易傳授鄭康成作易注而荊州牧劉表會稽太守王朗潁川荀爽南陽宋忠皆以易名家各有所述唯翻傳孟氏學旣作易注奏上之獻帝翻之言易以陰陽消息六爻發揮旁通升降上下歸於乾元用九而天下治依物取類貫穿比附始若瑣碎及其沈深解剝離根散葉暢茂條理遂於大道後儒罕能通之自魏王弼以虛空之言解易唐立之學官而漢世諸儒之說微獨資州李鼎祚作周易集解頗采古易家言而翻注爲多其後古書盡亡而宋道士陳

博以意造爲龍圖其徒劉牧以爲易之河圖洛書也河南邵雍又爲先天後天之圖宋之說易者翕然宗之以至於今牢不可拔而易陰陽之大義蓋蔽晦矣  
大清有天下元和徵士惠棟始考古義孟京荀鄭虞氏作易漢學又自爲辭釋  
曰周易述然掇拾於亡廢之後左右采獲十无二三其所述大氏宗爾虞氏而  
未能盡通則旁徵他說以合之蓋從唐五代宋元明朽壞散亂千有餘年區區  
修補收拾欲一旦而其道復明斯固難也翻之學既遠又具見馬鄭荀宋氏書  
考其是否故其義爲精又古書亡而漢魏師說可見者十餘家然唯鄭荀虞三  
家略有梗概可指說而虞尤較備然則求七十子之微言田何楊叔丁將軍之  
所傳者舍虞氏之注其何所自焉故求其條貫明其統例釋其疑滯信其亡闕  
爲虞氏義九卷又表其大旨爲消息二卷又著有虞氏易禮二卷虞氏易俟一  
卷虞氏易言二卷初惠棟作周易述大旨遵虞翻補以鄭荀諸儒學者以未能  
專一少之儀徵阮元謂漢人之易孟費諸家各有師承勢不能合惠傳虞氏易  
即傳漢孟氏易矣孤經絕學也惠言又著周易鄭氏義三卷周易荀氏九家義

一卷周易鄭荀義三卷易義別錄十四卷易緯略義二卷易圖條辨二卷其易義別錄序謂不盡見其辭而欲論其是非猶以也故其所著皆羽儀虞氏易者於禮有儀禮詞一卷讀儀禮記二卷皆特精審又有茗柯文五卷詞一卷子成孫字彥惟少時惠言課以說文令分六書譜之成象形二卷惠言著說文諧聲譜未竟而卒成孫後從莊述祖遊得其大要乃續成之卷第篇例多所增易凡五十卷其書分中僮薨林巖筐榮養誦千萋肆掛支皮絲鳩萋夙二十部此乃於毛詩中拈其最先出之字爲建首加以易韻屈韻而又以說文之聲分從之犁然不紊有各家所未及者嘗以示儀徵阮元元歎其超卓精細成孫兼精天學同里董祐誠歿爲校刊其遺書又著有端虛勉一居文集江承之字安甫歙縣人學於惠言時弟子從惠言受易禮者十數其甥董士錫受易通陰陽五行家言承之兼受易禮著有周易爻義虞氏易變表儀禮名物鄭氏詩譜年僅十有八

郝懿行字恂九棲霞人嘉慶四年進士授戶部主事二十五年補江南司主事



道光三年卒年六十九懿行爲人謙退訥若不出口然自守廉介不輕與人晉  
接遇非素知者相對竟日無一語追談論經義則喋喋忘倦所居四壁蕭然庭  
院蓬蒿常滿僮僕不備懿行處之晏如浮沈郎署視官之榮悴若無與於己者  
而一肆力於著述漏下四鼓者四十年所著有爾雅義疏十九卷春秋說略十  
二卷春秋比一卷山海經箋疏十八卷易說十二卷書說二卷懿行嘗曰邵晉  
涵爾雅正義蒐輯較廣然聲音訓詁之原尙多壅閼故鮮發明今余作義疏於  
字借聲轉處詞繁不殺殆欲明其所以然又曰余田居多載遇草木蟲魚有弗  
知者必詢其名詳察其形考之古書以徵其然否今茲疏中其異於舊說者皆  
經目驗非憑胸臆此余書所以別乎邵氏也懿行之於爾雅用力最久葉凡數  
易垂歿而後成於古訓同異名物疑似必詳加辨論疏通證明故所造較晉涵  
爲深高郵王念孫爲之點閱寄儀徵阮元刊行元總裁會試時從經義中臧拔  
懿行者也其箋疏山海經援引各籍正名辨物事刊疏謬辭取雅馴阮元謂吳  
氏廣注徵引雖博失之蕪雜畢沅校本訂正文字尙多疏略惟懿行精而不鑿

博而不濫懿行妻王照圓字瑞玉博涉經史當時著書家有高郵王父子棲霞  
郝夫婦之目著有詩說一卷列女傳補注八卷附女錄一卷女校一卷又與懿  
行以詩答問懿行錄之爲詩問七卷其爾雅義疏亦間取照圓說他著有詩經  
拾遺一卷汲冢周書輯要一卷竹書紀年校正十四卷荀子補注一卷晉宋書  
故一卷補晉書刑法志一卷食貨志一卷文集十二卷照圓又有列仙傳校正  
二卷

陳壽祺字恭甫閩縣人少能文年十八臺灣平撰上福康安百韻詩并序沈博  
絕麗傳誦一時嘉慶四年成進士選翰林院庶吉士散館授編修尋告歸性至  
孝不忍言仕家貧無食父命之入都九年充廣東鄉試副考官十二年充河南  
鄉試副考官十四年充會試同考官京察一等記名御史壽祺以不得迎養二  
親常愀然不樂將告歸矣俄聞父歿慟幾絕奔歸服除乞養母母歿終喪年五  
十三有密薦於朝者卒不出壽祺會試出朱珪阮元門乃專爲漢儒之學又及  
見錢大昕段玉裁王念孫程瑤田諸人故學益精博解經得兩漢大義每舉一

義輒有折衷兩漢經師莫先於伏生莫備於許氏鄭氏壽祺闡明遺書著尙書大傳箋三卷序錄一卷訂誤一卷附漢書五行志綴以他書所引劉氏五行傳論三卷序曰伏生大傳條撰大義因經屬指其文辭爾雅深厚最近大小載記七十子之徒所說非漢諸儒傳訓之所能及也康成百世儒宗獨注大傳其釋三禮每援引之及注古文尙書洪範五事康誥孟侯文王伐崇弒耆之歲周公克殷踐奄之年咸據大傳以明事豈非閎識博通信舊聞者哉且夫伏生之學尤善於禮其言巡狩朝覲郊尸迎日廟祭族燕門塾學校養老擇射貢士考績郊遂采地房堂路寢之制后夫人入御太子迎問諸侯之法三正之統五服之色七始之素八伯之樂皆唐虞三代遺文往往六經所不備諸子百家所不詳今其書散逸十無四五尤可寶重宋朱子與勉齋黃氏纂儀禮經傳通解攷摭大傳獨詳蓋有裨禮學不虛也五行傳者自夏侯始昌至劉氏父子傳之皆善推旤福著天人之應漢儒治經莫不明象數陰陽以窮極性命故易有孟京卦氣之候詩有翼奉五際之要春秋有公羊災異之條書有夏侯劉氏許商李尋

洪範之論班固本大傳攬仲舒別向歆以傳春秋告往知來王事之表不可廢也是以錄漢書五行志附於後以備一家之學云又著五經異義疏證三卷左海經辨二卷左海文集十卷左海駢體文二卷絳趺堂詩集六卷東越儒林文苑後傳二卷東觀存藥一卷壽祺歸後阮元延課謁經精舍生徒元纂羣經古義爲經郭壽祺爲撰條例明所以原本訓辭會通典禮存家法而析異同之意後主泉州清源書院十年主道峰書院十一年與諸生言修身勵學教以經術作義利辨知恥說科舉論以示學者規約整肅士初苦之久乃悅服家居與諸當事書於桑梓利弊蒿目瘁心雖觸忌諱無所隱明儒黃道周孤忠絕學壽祺搜輯遺文爲之刊行又具呈大吏乞疏請從祀孔廟議上如所請道光十四年卒年六十四子喬樞字樸園道光五年舉人二十四年以大挑知縣分發江西歷官分宜弋陽德化南城諸縣署袁州臨江撫州知府以經術飾吏治居官有聲同治七年卒於官年六十一初壽祺以鄭注禮記多改讀又嘗鉤考齊魯韓三家詩佚文佚義與毛氏異同者輯而未就病革謂喬樞曰爾好漢學治經知

師法他日能成吾志九原無憾矣喬樞乃軸釋舊聞勒爲定本成禮記鄭讀考六卷三家詩遺說考十五卷又著齊詩翼氏學疏證二卷詩緯集證四卷謂齊詩之學宗旨有三曰四始曰五際曰六情皆以明天地陰陽終始之理考人事盛衰得失之原言王道治亂安危之故齊先亡最爲寡證獨翼奉存其百一且其說多出詩緯察躡象推厯數徵休咎蓋齊學所本也詩緯亡而齊詩遂爲絕學矣又著今文尙書經說考三十四卷歐陽夏侯經說考一卷謂二十九篇今文具存十六篇既無今文可考遂莫能盡通其義凡古文易書詩禮論語孝經所以傳悉由今文爲之先驅今文所無輒廢向微伏生則萬古長夜矣歐陽大小夏侯各守師法苟能得其單辭片義以尋千百年不傳之緒則今文之維持聖經於不墜者豈淺尠哉又有詩經四家異文考五卷毛詩鄭箋改字說四卷禮堂經說二卷最後爲尙書說時宿學漸蕪考據家爲世嘗嘗獨湘鄉曾國藩見其書以爲可傳自元和惠氏高郵王氏外惟喬樞能修世業張大其家法壽祺同里治古學者有謝震何治運震原名在震字甸男侯官人乾隆五十四年

舉人順昌學教諭震嘗與閩縣林一桂歐寄萬世美俱精三禮震尤篤學嗜古然斷斷持漢學好排擊宋儒鑿空逃虛之說壽祺與震同舉鄉試少震六歲視爲畏友震重氣誼有志用世而不遇於時年四十卒弟子緝其遺著有禮案二卷精覈勝敖氏又有四書小箋一卷四聖年譜一卷工詩有櫻桃軒詩集二卷治運字郊海閩縣人嘉慶十二年舉人治聞彊識篤志漢學粵督阮元嘗聘纂廣東通志後遊浙中巡撫陳若霖爲鈺其經解及論辨文字四卷名何氏學道光元年卒年四十七治運與壽祺友及卒壽祺以謂無與爲質不獲以輔成其學也係經世字濟侯惠安人壽祺弟子壽祺課士不一格游其門者若仙遊王捷南之詩禮春秋諸史晉江杜彥士之小學惠安陳金城之漢易將樂梁文之性理建安丁汝恭德化賴其煥建陽張際亮之詩古文辭皆足名家而經世學成蚤世世以儒林推之經世少喜讀近思錄後沈研經義謂不通經學無以爲理學不明訓詁無以通經不知聲音文字之原無以明訓詁著說文會通十六卷爾雅音疏六卷釋文辨證十四卷韻學溯源四卷十三經正讀定本八十卷

經傳釋詞續編八卷又著春秋例辨八卷考經說二卷夏小正說一卷詩韻訂  
二卷揚齋經說六卷讀經校語四卷柯蘅膠州人從壽祺受許鄭之學嘗以史  
漢諸表爲紀傳之綱領而譌誤舛奪最爲難治乃條而理之著漢書七表校補  
二十卷爲例十一曰辨事誤二曰辨文字誤三曰辨注誤四曰辨諸家攷證之  
誤五曰以本書證本書之誤六曰史漢互證而知其誤七曰漢書荀紀互證而  
知其誤八曰漢書水經注互證而知其誤九曰據紀傳以補表之闕十曰據今  
地以證表之誤鉤稽隱陋凡前人之說皆取而辨其是非至前人未及者又得  
二三十事亦專門之學也尤長於詩著有聲詩圖微二卷舊雨草堂詩集四卷  
其說經說史之作門人集爲舊雨草堂札記

許宗彥字積卿德清人九歲能讀經史善屬文侍郎王昶愛其才作積卿字說  
以贈嘉慶四年進士授兵部主事就官兩月以親老遽引疾歸親歿卒不出居  
杭州杜門以讀書爲事其學無所不通探賾索隱識力卓然發千年儒者所未  
發考周五廟二祫以爲周制五廟之外別有二祫爲遷廟之殺以厚親之仁宗

廟之外別立祖宗與禘郊同爲重祭以大尊尊之義諸經無文武二廟不毀之說誤始於韋元成而劉歆因之鄭康成亦因之祧者遷廟乃謂爲不遷之廟名實乖矣又考文武二世室以爲周文武皆配於明堂太室故有文武世室之號孔穎達誤謂伯禽稱文世室武公稱武世室以公羊傳周公稱太廟魯公稱世室羣公稱宮證之外甚又考禹貢三江以爲漢志言分江水首受江東至餘姚入海夫曰分江水曰首受江則非南江之正流可知曰東至餘姚入海則非在吳入海可知與禹貢三江無與又考太歲太陰以爲太歲者歲星與日同次斗杓所建之辰也太陰始寅終丑太歲始子終亥漢律志曰太初元年歲前十一月朔旦冬至歲在星紀婺女六度歲名困敦此太歲始子之確證武帝詔曰年名焉逢攝提格此太陰始寅之確證漢書天文志始誤以甘石之言太陰者係之太歲而與太初之太歲遂差兩辰乃以爲星有贏縮非矣又說六書轉注以爲從偏旁轉相注說文曰轉注者建類一首同意相受考老是也後序曰其建首也立一爲端即建類一首之謂也如示爲部首从示之偏旁注爲神祇等字



从神祇注爲祠祀祭祝等字展轉相注皆同意爲一類戴震指爾雅詁訓爲轉注而不知詁訓出於後來非制字時所豫有也段玉裁引戴說又言爾雅字多假借而不知假借者本無其字今如初哉首基之訓非本無首字而假初哉諸字以當之也其他所著學說能持漢宋儒者之平禮論治論諸篇皆稽古證今通達政體尤精天文得泰西推步秘法自製渾金球別具神解嘗援緯書四游以疏本天高卑而知不同心非渾圓之理考周髀北極瑤瑤以推古人測驗之法七政皆統於天而知東漢以前用赤道不用黃道爲得諸行之本論日左右旋一理以王錫闡解黃道右旋赤道平行戴震分黃極爲二行其說頗不分明爲剖析之洞徹微妙皆言天家所未及性孝友慎於交游體羸而神理激淡見者皆肅然敬之儀徵阮元會試舉主也重其學術行誼以子女爲媿家

呂飛鵬字雲里旌德人從寧國凌廷堪治禮廷堪器之以爲能傳其學山陽汪廷珍視學安徽喜士通古經義補飛鵬縣學附生飛鵬少讀周禮長而癖嗜廷堪嘗著周官九拜九祭解鄉射五物攷援據禮經疏通證明足發前人所未發

飛鵬師其意而變通之成周禮補注六卷其大旨以鄭氏爲宗自序曰漢魏之治周禮者如賈逵張衡孫炎薛綜陳劬崔靈恩之注遺文軼事散見羣籍或與鄭義符合或與鄭義乖違同者可得其會通異者可博其旨趣是用廣搜衆說補所未備條系於經文之下或旁采他經舊注或兼取近儒經說要於申明古義而已又著周禮古今文義證六卷嘗攷康成本治小戴禮後以古經校之取其於義長且順者爲鄭氏學又注小戴所傳禮記四十九篇又嘗作毛詩箋今取鄭氏之學證鄭氏之注則辭易瞭然即彼此互歧前後錯出亦不煩辭費而得失已明故於三者刺取爲多至許氏說文解字徵引周禮彼此互異取以推廣鄭義不嫌抵牾其他史冊流傳事系本朝禮遵周典亦備采擇用俟辯章猶是鄭氏況以漢法之意也平居書齋閣自銘誠粹然出於儒先道學鄉饑籌粟倡振人多德之有爭辯一言立釋嘗戒其子賢基曰成名易成人難又曰言官不易爲母陳利而昧大體毋挾私而務高名其本行如此賢基卒以忠節著道光二十九年卒年七十三子賢基工部右侍郎諡文節自有傳有清爲周禮之

學者有惠士奇沈彤莊存與沈夢蘭段玉裁徐養原宋世榮夢蘭字古春烏程人乾隆四十八年舉人官湖北宜都縣知縣夢蘭博通諸經實事求是尤邃於周官成周禮學一書分溝洫畿封邦國都鄙城郭宮室職官祿田貢賦軍旅車乘禮射律度量衡十三門取司馬法逸周書管子呂覽伏傳戴記諸古書參互攷證合之書詩禮記三傳孟子先儒所病其抵牾者無不得其會通爲圖若干並取經傳文之與周官相發明者釋於篇他著有易書詩孟子學五省溝洫圖說其易學自序云自輯周禮學於易象得非比師訟同人大有若干卦錯綜參伍知易之爲道先王一切之治法於是乎在而孟子學則又以疏證周官之故彙其餘說以成軼者其溝洫圖說卷不盈寸凡南北形勢河道原委歷代沿革衆說異同與夫溝遂經畛之體廣深尋尺之數以及畜水止水蕩水均水舍水瀉水之事皆備復證之周官考究詳覈官湖北時奉檄襄築荊州隄工上江隄埽工議及荆江論沔陽水災復奉檄會勘作水利說以諭沔民原本經術有神實用皆此類也世榮字尙助臨海人乾隆五十三年舉人以教習官陝西扶風

知縣地當川藏孔道夫馬悉斂之民計畝率錢名曰公局世犖多所裁革無妄取時教匪初定州縣多以州縣遼邇攬扶風民有持齋爲怨家所訐者大府飛檄至捕而鞠之皆良民釋弗顧罷歸擊求經訓熟於諧聲假借之例著周禮故書疏證六卷儀禮古今文疏證二卷

嚴可均字景文烏程人嘉慶五年舉人官建德縣教諭引疾歸可均博聞強識精考據之學與姚文田同治說文爲說文長編亦謂之類考有天文算術地理類草木鳥獸蟲魚類聲類說文引羣書羣書引說文類積四十五册又輯鐘鼎拓本爲說文翼十五篇將校定說文撰爲疏義係星衍促其成乃撮舉大略就毛氏汲古閣初印本別爲校議三十篇專正徐鉉之失又與丁濬同治唐石經著校文十卷自序云余弱冠治經稍見宋槧本既又念若漢若魏若唐若孟蜀若宋嘉祐紹興各立石經今僅嘉祐四石紹興八十七石皆殘本而唐大和石壁二百二十八石踴然獨存此天地間經本之最完最舊者也夫唐代四部之富埒於梁隋而鄭覃唐元度輩皆通儒頗見古本苟能聚正積非歸於眞是即

方駕蒸平不難而僅止於是今也古本皆亡欲復舊觀已難爲力可慨也然而後唐彫版實依石經句度鈔寫歷宋元明轉刻轉誤而石本幸存縱不足與復古以匡今繆有餘也獨怪數百年來學士大夫眇或過問者間有一二好古之士亦與冢碣寺碑同類而並道之康熙初顧炎武始略校焉觀其所作九經誤字金石文字記刺取屢屢是非寡當又誤信王堯惠之補字以誣石經顧氏且然況其他乎烏乎石經者古本之終今本之祖治經不及見古本而並荒石經匪直荒之又交口誣之豈經之幸哉余不自揆欲爲今版本正其誤爲唐石經釋其非爲顧氏等祛其惑隨讀隨校凡石經之磨改者旁增者與今本互異者皆錄出輒據注疏釋文旁稽史傳及漢唐人所徵引者爲之左證而石臺孝經附其後焉嘉慶十三年詔開全唐文館可均以越在草茅無能爲役慨然曰唐之文盛矣哉唐以前要當有總集斯事體大是余之責也乃輯上古三代秦漢三國六朝文使與全唐文相接多至三千餘家人各系以小傳足以攷證史文皆從蒐羅殘賸得之覆檢羣書一字一句稍有異同無不校訂一手寫定不假

衆力唐以前文咸萃於此焉又校輯諸經逸注及佚子書等數十種合經史子集爲四錄堂類集千二百餘卷賡元照字九能歸安人十歲能爲四體書補諸生儀徵阮元大興朱珪深賞之熟於爾雅作匡名八卷旁羅異文軼訓鉤稽而疏證之著有悔菴文鈔詩鈔詞鈔娛親雅言等書

焦循字里堂甘泉人嘉慶六年舉人曾祖源祖饒父慈世傳易學循少穎異八歲在阮庶堯家與賓客辨壁上馮夷字曰此當如楚詞讀皮冰切不當讀如縫阮奇之妻以女旣壯雅尙經術與阮元齊名元督學山東浙江俱招循往遊性至孝丁父及嫡母謝艱哀毀如禮一應禮部試後以生母股病愈而神未健不復北行股歿循毀如初服除遂託足疾不入城市者十餘年葺其老屋曰半九書塾復構一樓曰雕菰樓有湖光山色之勝讀書著述其中嘗歎曰家雖貧幸蔬菜不乏天之疾我福我也吾老於此矣嘉慶二十五年卒年五十八循博聞強記識力精卓每遇一書無論隱奧平衍必究其源以故經史麻算聲音訓詁無所不精幼好易父問小畜密雲二語何以復見於小過循反復其故不可得

既學洞淵九容之術乃以數之比例求易之比例漸能理解著易通釋二十卷  
自謂所悟得者一曰旁通二曰相錯三曰時行又以古之精通易理深得義文  
周孔之指者莫如孟子生孟子後能深知其學者莫如趙氏爲疏踳駁未能發  
明著孟子正義三十卷謂爲孟子作疏其難有十然近代通儒已得八九因博  
采諸家之說而下以己意合孔孟相傳之正指又著六經補疏二十卷以說漢  
易者每屏王弼然弼解箕子用趙賓說讀彭爲旁借雍爲變通孚爲浮解斯爲  
斷蓋以六書通借其解經之法未遠於馬鄭諸儒爲周易王注補疏二卷以尙  
書僞孔傳說之善者如金縢我之不辟訓辟爲法居東即東征罪人即管蔡大  
誥周公不自稱王而稱成王之命皆非馬鄭所能及爲尙書孔氏傳補疏二卷  
以詩毛鄭義有異同正義往往雜鄭於毛比毛於鄭爲毛詩鄭氏箋補疏五卷  
以左氏傳稱君君無道稱臣臣之罪杜預揚其詞而暢衍之預爲司馬懿女壻  
目見成濟之事將以爲司馬飾即用以爲己飾萬斯大惠士奇顧棟高等未能  
摘姦而發覆爲春秋傳杜氏集解補疏五卷以禮以時爲大訓詁名物亦所宜

究爲禮記鄭氏注補疏三卷以論語一書發明義文周公之指參伍錯綜引申觸類亦與易例同爲論語何氏集解補疏三卷合之爲二十卷又錄當世通儒說尙書者四十一家書五十七部仿衛湜禮記之例以時之先後爲序得四十四卷曰書義叢鈔又著禹貢鄭注釋一卷毛詩地理釋四卷毛詩鳥獸草木蟲魚釋十一卷陸瓊疏考證一卷羣經宮室圖二卷論語通釋一卷又著有離菰樓文集二十四卷詞三卷詩話一卷循壯年卽名重海內錢大昕王鳴盛程瑤田等皆推敬之始入都謁座主英和和曰吾知子之字曰里堂江南老名士屈久矣歿後阮元作傳稱其學精深博大名曰通儒世謂不愧云子廷琥字虎玉優廩生性醇篤善承家學阮元稱爲端士循嘗與廷琥纂孟子長編三十卷後撰正義其廷琥有所見亦本苑氏穀梁之例爲之錄存循又以測圓海鏡益古演段二書不詳開方之法以常法推之不合旣得秦道古數學九章有正圓開方法爲開方通釋乃謂廷琥曰汝可列益古演段六十四問用正員開方法推之廷琥布策下算一一符合著益古演段開方補一卷陽湖孫星衍不信西人地



圓之說以楊光先之斥地圓比孟子之距楊墨廷琥謂古之言天者三家曰宣夜曰周髀曰渾天宣夜無師承渾蓋之說皆謂地圓泰州陳氏宣城梅氏悉以東西測景有時差南北測星有地差與圓形合爲說且大戴有曾子之言內經有岐伯之言宋有邵子程子之言其說非西人所自創因博搜古籍著地圓說二卷他著有密梅花館詩文鈔顧鳳毛字超宗江蘇興化人乾隆四十九年南巡召試列二等五十三年副榜貢生父九苞字文子長於詩禮九苞母任氏大椿祖姑通經達史九苞之學母所教也乾隆四十六年進士歸時卒於路著述不傳鳳毛亦受經於祖母年十一通五經及長與焦循同學循就鳳毛問難始用力於經鳳毛又學音韻律呂於嘉定錢塘撰楚辭韻攷入聲韻攷毛詩韻攷皆得塘旨又撰毛詩集解董子求兩攷三代田制攷未成而卒年二十七卒後循理其喪作招亡友賦哭之鍾懷李鍾泗皆有名均甘泉人鍾懷字保岐優貢生與阮元焦循相善共爲經學旦夕討論務求於是居恆禮法自守不與世爭名交游中稱爲君子嘉慶十年卒年四十五著有臥厓考古錄四卷其漢儒考

較陸德明所載增多十餘人鍾泗字涪石嘉慶六年舉人治經精左氏春秋撰規規過一書抑劉仲杜焦循服其精博

李富孫字既沔嘉興人嘉慶六年拔貢生良年來孫良年自有傳從祖集字敬堂乾隆二十八年進士官邵縣知縣精研經學以漢唐爲宗嘗爲學規論以課窮經課經濟著有願學齋文鈔富孫學有原本與伯兄超孫從弟遇孫有後三李之目長游四方就正於盧文弨錢大昕王昶孫星衍佺聞緒論阮元撫浙肄業詰經精舍遂湛深經術尤好讀易著易解賸義蓋易學三派有漢儒之學鄭虞荀陸諸家精矣有晉唐之學王弼孔穎達諸家即北宋胡瑗石介東坡伊川猶是支流餘裔至宋陳邵之學出本道學之術創爲圖說舉義文周孔之所未及漢以後諸儒之所未言者以自神其附會之說理其理而非易之所謂理數其數而非易之所謂數而前聖之易道晦矣唐李鼎祚所輯易解精微廣大聖賢遺旨略見於此然其於三十六家之說尙多未采其遺文賸義間見他書猶可蒐輯爰綴而錄之成書三卷又成校異二卷又著七經異文釋就經史傳注

諸子百氏所引以及漢唐宋石經宋元槧本校其異同或字有古今或音近通假或沿襲乖舛外悉據古誼而疏證之而前儒之論說並爲蒐輯使正其譌謬辨其得失折衷以求一是凡易六卷尙書八卷毛詩十六卷春秋三傳十二卷禮記八卷同里馮登府稱其詳核奧博爲詁異誼者集其大成又謂說文一書保氏六書之旨賴以僅存自篆變爲隸隸變爲眞文字日繁譌僞錯出或有形聲意義大相區別亦有近似而其實異後人多混而同之或有一篆之形從某爲古猶爲或體後人竟析而二之經典文字往往昧於音訓擅爲改易甚與本義相迕亦字學之大變夫假借通用說文自有本字有得通借者有不容通借而並爲俗誤者援據經典以相證契俾世之踵謬沿譌焯然可辨爲說文辨字正俗八卷同里錢泰吉謂其書大旨折衷段注而亦有段所未及者讀說文之津梁也他著有漢魏六朝墓銘纂例四卷鶴徵錄八卷後錄十二卷曝書亭詞注七卷梅里志十六卷校經頤文彙十八卷超孫字引樹嘉慶六年舉人會稽縣教諭剖析經義尤深於詩嘗以毛詩草木蟲魚則有疏名物則有解地理則有

攷而詩中所稱之人則未有纂輯成書者因取詩人之氏族名字博考經史諸子及近儒所著述並列國之世次洎其人之行事搜羅薈集爲詩氏族考六卷官會稽時課諸生依甯化雷鉉學規條約士習日上又著拙守齋集遇孫字金淵集係優貢生處州府訓導幼傳祖訓淹貫經史著有尙書隸古定釋文八卷漢孔安國以科斗文難知取伏生今文次第之爲隸古定宋薛宣因之成古文訓遇孫又以隸古文難知引說文諸書疏通之譌者是正疑者則闕性嗜金石有芝省齋碑錄八卷金石學錄四卷官處州時以處州地僻山遠阮元兩浙金石志未免脫漏乃搜輯數百餘種爲括蒼金石志八卷他著有日知錄補正一卷校正一卷古文苑拾遺十卷天香錄八卷隨筆六卷詩文集十八卷

胡承珙字墨莊涇縣人嘉慶十年進士翰林院庶吉士散館授編修十五年充廣東鄉試副考官尋遷御史轉給事中自以身居言路當周知天下利弊陳之於上方不負職數年中陳奏甚多多見施行而其最切中時病者則有條陳虧空弊端各條一曰冒濫宜禁司庫支發錢糧向有扣除二三成之弊故藩司書

吏將不應借支之款冒支濫借此在領者便於急需不敢望其足數而在放者利於多扣不復問其合宜則雖應放而仍與浮冒無異一曰抑勒宜禁州縣交代例限茶巖均不准充抵近日仍多以議單欠票虛開實抵者總由上司多方抑勒逼令新任擔承一曰糜費宜省各省攤捐津貼名目豈盡必不可省聞州縣所解各上司衙門飯食季規等銀逐歲增加如邸報一事安徽省每年通派各屬萬金一省如此他省可知一事如此他事可知一曰升調宜慎部選人員多係初任或尙能不敢輕易接受惟佐雜題升及調補繁缺二者每多久歷仕途習成狡滑在題升者急於得缺明知此地之多累不復顧後而瞻前在調補者遷就一時轉因原任之有虧希圖挪彼以掩此究之擔承彌補皆屬空名不過剗肉補瘡甚且變本加厲其言深切著明二十四年授福建分巡延建邵道編查保甲設立緝捕章程八條匪徒斂跡調署臺灣兵備道緝獲洋盜張充等置於法旋乞假回籍臺灣素稱難治承琪力行清莊弭盜之法民番安肅自承琪去後彰化淡水卽以械鬪起釁矣道光十二年卒年五十七承琪究心經學

尤專意於毛詩傳歸里後鍵戶著書與長洲陳奐往復討論不絕著毛詩後箋三十卷其書主於申述毛義自注疏而外於唐宋元諸儒之說及近人爲詩學者無不廣徵博引而於名物訓詁及毛與三家詩文有異同類皆剖析精微折衷至當而其最精者能於毛傳本文前後會出指歸又能於西漢以前古書中反覆尋考貫通詩義證明毛旨凡三四易藥手自寫定至魯頌泂水章而疾作遺言屬陳奐校補奐乃爲續成之又以鄭君注儀禮參用古今文二本撮其大例有必用其正字者有即用其借字者有務以存古者有兼以通今者有因彼以決此者有互見而並存者閱意妙旨有關於經實夥遂取注中疊出之字並讀如讀爲當爲各條排比梳櫛考其訓詁明其假借參稽旁采疏通而證明之作儀禮古今文疏義十七卷又謂惠氏棟九經古義未及爾雅遂補撰數十條成二卷小爾雅原本不傳今存孔叢子中世多謂爲僞書作小爾雅義證十三卷斷以爲眞復著有求是堂詩文集三十四卷胡秉虔字伯敬績溪人嘉慶四年進士官刑部主事改甘肅靈壁縣知縣升丹噶爾同知卒於官秉虔自幼嗜

學博通經史管入都肄業成均夜讀必盡燭二條尤精於聲音訓詁著古韻論  
三卷辨江戴段孔諸家之說細入毫芒瑣不可易說文管見三卷發明古音古  
義多獨得之見末論二徐書有灼見語蓋其所致力也他著有周易尙書論語  
小誠各八卷卦本圖考一卷尙書序錄一卷漢西京博士考二卷甘州明季成  
仁錄四卷河州景忠錄三卷朱珩字蘭坡涇縣人珩生三年而孤祖命爲季父  
後嗣母汪未婚守志珩孝事之與生母同昆弟均相友愛嘉慶七年成進士選  
翰林院庶吉士與幸翰林院栢梁體聯句宴散館授編修擢至侍讀與修明鑑  
坐承襲官累降編修道光元年直上書房屢蒙嘉獎有品學兼優之褒升右春  
坊右贊善告養歸植品敦俗獎誘後進厯主鍾山正誼紫陽書院卒年八十有  
二珩愛書如命學有本原主講席幾三十年教士以通經學古爲先與桐城姚  
鼎陽湖李兆洛並負儒林宿望蓋鼎足而三云著有說文假借義證二十八卷  
經文廣異十二卷文選集釋二十四卷小萬卷齋詩文集七十卷輯有國朝古  
文彙鈔二百七十二卷又有詁經文鈔六十二卷匯有清諸名家說經之文依

次標題篇幅完善尤足爲後學津逮云

波略字曉樓江都人國子監生曙好學根性家貧讀四子書未畢即去鄉雜作傭保而績學不倦年二十爲童子師問所當治業於涇包世臣世臣曰治經必守家法專法一家以立其基則諸家漸通乃示以武進張惠言所輯四子書漢說數十事曙乃稽典禮考古訓爲四書典故駁六卷歛洪梧甚稱之既治鄭氏學得要領又從吳沈欽韓問疑義益貫穿精審後聞武進劉逢祿論何氏公羊春秋而好之及入都爲儀徵阮元校輯經郭盡見魏晉以來諸家春秋說深念春秋之義存於公羊而公羊之學傳自董子董子春秋繁露識禮義之宗達經權之川行仁爲本正名爲先測陰陽五行之變明制禮作樂之原體大思精推見至隱可謂善發微言大義者然旨奧詞隨未易得其會通淺嘗之夫橫生皆議經心聖符不絕如綫乃博稽旁討承意儀志梳其章櫛其句爲注十七卷又病宋元以來學者空言無補惟實事求是庶幾近之而事之切實無過於禮著公羊禮疏十一卷公羊禮說一卷公羊問答二卷家居讀禮以喪服爲人倫大



經後儒舛議是非頗謬作禮論百篇引申鄭義阮元延曙入粵課諸子曙書與元商榷乃刪合爲三十九篇爲一卷道光九年卒年五十五曙有甥儀徵劉文淇貧而穎悟愛而課之遂知名其學實自曙出云薛傳均字子韻甘泉人諸生博覽羣籍強記精識就福建學政陳用光聘用光見所著書恨相見晚旋以疾卒於汀州試院年四十一傳均於十三經注疏功力最深大端尤在小學於許君原書鉤稽貫串洞其義而熟其辭嘉定錢大昕文集內有說文答問一卷深明通轉假借之義傳均博引經史以證之成說文答問疏證六卷又以文選中多古字條舉件繫疏證證明爲文選古字通十二卷

劉逢祿字申受武進人祖綸大學士諡文定自有傳外王父莊存與舅莊述祖並以經術名世逢祿盡傳其學嘉慶十九年進士選翰林院庶吉士散館改禮部主事二十五年仁宗大事逢祿搜集大禮創爲長編自始事至奉安山陵典章具備道光三年通政司參議盧浙請以尙書湯斌從祀文廟議者以斌康熙中在上書房獲譴乾隆中嘗奉駁難之逢祿攬筆書曰后夔典樂猶有朱均呂

望陳書難匡管蔡尙書汪廷珍善而用之遂奉兪旨四年補儀制司主事越南貢使陳請爲其國王母乞人獲得旨賞給而諭中有外夷貢道之語其使臣欲請改爲外藩部中以詔書難更易逢祿草牒復之曰周官職方王畿之外分九服夷服去王國七千里藩服九千里是藩遠而夷近說文羌狄蠻貊字皆從物旁惟夷從大從弓考東方大人之國夷俗仁仁者壽有東方不死之國故孔子欲居之且乾隆間奉上諭申飭四庫館不得改書藉中夷字作彝舜東夷之人文王西夷之人我朝六合一家盡去漢唐以來拘忌嫌疑之陋使者無得以此爲疑越南使者遂無辭而退逢祿在禮部十二年恒以經義決疑事爲衆所欽服類如此其爲學務通大義不專章句由董生春秋闕六藝家法由六藝求觀聖人之志嘗謂世之言經者於先漢則古詩毛氏後漢則今易虞氏文詞稍爲完具然毛公詳古訓而略微言虞翻精象變而罕大義求其知類通達微顯闡幽者則公羊在先漢有董生後漢有何劭公氏子夏喪服傳有鄭康成氏而已先漢之學務乎大體故董生所傳非章句訓詁之學也後漢條理精密要以何

劭公鄭康成氏爲宗然喪服於五禮特其一端春秋文成數萬其旨數千天道  
決人事備以之貫羣經無往不得其原以之斷史可以決天下之疑以之持身  
治世則先王之道可復也於是尋其餘貫正其統紀爲公羊春秋何氏釋例三  
十篇又析其疑滯強其守衛爲箋一卷答難二卷又推原穀梁氏左氏之得失  
爲申何難鄭四卷又博徵諸史刑禮之不中者爲儀禮決獄四卷又推其意爲  
論語述何夏時經傳箋中庸崇禮論漢紀述例各一卷別有緯略二卷春秋賞  
罰格一卷愍時學者說春秋皆襲宋儒直書其事不煩褒貶之辭獨孔廣森爲  
公羊通義能抉其蔽然尙不能信三科九旨爲微言大義所在乃著春秋論上  
下篇以張聖權又成左氏春秋考證二卷知者謂與閻惠之辯古文尙書等達  
祿於易主虞氏於書匡馬鄭於詩初尙毛學後好三家有易虞氏變動表六爻  
發揮旁通表卦象陰陽大義虞氏易言補各一卷又爲易象賦卦氣頌提其指  
要尙書今古文集解三十卷書序述聞一卷詩聲衍二十七卷所爲詩賦連珠  
論序碑記之文約五十篇道光九年卒年五十有六弟子潘準莊續樹趙振祈

皆從學公羊及禮有名宋翔鳳字于庭長洲人嘉慶五年舉人湖南新寧縣知縣亦莊述祖之甥述祖有劉甥可師宋甥可友之語劉謂逢祿宋謂翔鳳也翔鳳通訓詁名物志在西漢家法微言大義得莊氏之真傳著論語說義十卷序曰論語說曰子夏六十四人共撰仲尼微言以當素王微言者性與天道之言也此二十篇尋其條理求其指趣而太平之治素王之業備焉自漢以來諸家之說時合時離不能盡一當綜覈古今有纂言之作其文繁多因別錄私說題爲說義又有論語鄭注十卷大學古義說二卷孟子趙注補正六卷孟子劉熙注一卷四書釋地辨證二卷卦氣解一卷尙書說一卷尙書譜一卷爾雅釋服一卷小爾雅訓纂六卷五經要義一卷五經通義一卷過庭錄十六卷咸豐九年重賦鹿鳴諭年卒年八十二戴望字子高德清人諸生始好詞章繼讀博野顏元書爲顏氏學最後謁長洲陳奐通聲音訓詁復從翔鳳授公羊春秋遂通公羊之學著論語注二十卷用公羊家法演逢祿論語述何之微言他著有管子校注二十四卷顏氏學記十卷謫麟堂遺集四卷

雷學淇字瞻叔順天通州人父鎔字宗彝乾隆二十七年舉人江西崇仁縣知縣道光初元詔天下臣民嚴冠服之辨鎔著古今服緯以申古義抑奢侈至九年書成年九十矣學淇嘉慶十九年進士任山西和順縣知縣改貴州永從縣知縣生平好討論之學每得一解必求其會通務於諸經之文無所抵忤以父鎔著古今服緯爲之注釋附以釋問一篇異同表二篇又以夏小正一書備三統之義究心參攷二十餘年以堯典中星諸經屢數采虞史伯夷之說據周公垂統之文檢校異同訂其譌誤網羅放失尋厥指歸著夏小正經傳考二卷又考定經傳之文爲之疏證成夏小正本義四卷每慨竹書紀年自五代以來頗多殘闕爰博考李唐以前諸書所稱引者積以九年之蒐輯頗復舊觀嘗謂孟子先至梁後至齊此經之明文即無他左驗亦當從之爲說況竹書紀年曰梁惠成王後元十五年齊威王薨十七年惠成王卒然則惠王後元十六年齊宣王始即位孟子至梁當即在後元十六年王卒之前一歲也史記誤謂惠王立三十六年卽卒故云三十五年孟子至梁而以惠王改元之後十六年爲襄王

之世今據竹書稱梁惠會諸侯於徐州改元稱王故孟子呼之曰王史謂孟子至梁之二年惠王卒襄王立以本經考之其言可信但卒於改元後之十七年非三十六年也襄王既立孟子見其不似人君乃東至齊據竹書即齊宣卽位之二年也梁至齊千數百里故曰千里而見王若孟子先見齊宣王由鄒之齊六百餘里不得云千里矣齊人取燕孟子明謂宣王時事史記於齊失載悼子侯剡二代將威宣之立皆移前二十二年於齊人伐燕事不知折衷孟子而年表謂在潁王十年司馬溫公終求其說而不得乃將宣之卽位下移十年以遷就孟子自後說者疑信各半實皆未有定論今據紀年則伐燕在宣王七年實周赧王之元年凡孟子書所記古人年歲以史記漢書之說推之皆不合者以紀年推之無不合且以竹書長麻推驗列宿之歲差歷代之日蝕白唐虞以來無有差貸嘗自云傳箋注疏取舍多殊非敢嘗議前賢期於事理之合云爾他著有校輯世本二卷古今天象考十二卷附圖說二卷亦嘗撰齊經義考及文集三十二卷王荳齡字北堂昌平人道光元年副貢旋舉孝廉方正官新安柏

鄉兩縣教諭嗜漢學精訓詁受業於高郵王引之經義述聞中時引其說著有周秦名字解詁補一卷即補引之所闕疑者崔述字武承大名人乾隆二十七年舉人選福建羅源縣知縣武弁多藉海盜邀功誣商船爲盜述平反之未幾投劾歸著書三十餘種而考信錄一書尤生平心力所專注凡考古提要二卷上古考信錄二卷唐虞考信錄四卷夏商考信錄四卷豐鎬考信錄八卷豐鎬別錄三卷洙泗考信錄四卷洙泗餘錄三卷孟子事實錄二卷考古續說二卷附錄二卷又有王政三大典考三卷讀風偶識四卷尙書辨僞二卷論語餘說一卷讀經餘論二卷名考古異錄其著書大旨謂不以傳注雜於經不以諸子百家雜於傳注以經爲主傳注之合於經者著之不合者辨之異說不經之言則闕其謬而削之如謂易傳僅溯至伏羲春秋傳僅溯至黃帝不應後人所知反多於古人凡緯書所言十紀史所云天皇地皇人皇皆妄也謂戰國楊墨橫議常非堯舜薄湯武以快其私毀堯則託諸許由毀禹則託諸子高毀孔子則託諸老聃毀武王則託諸伯夷太史公尊黃老故好采異端雜說學者但當信

論孟不當信史記謂夏商周未有號爲某公者公亶父相連成文猶所謂公劉也古公亶父猶言昔公亶父也謂匡爲宋邑似畏匡過宋本一事匡人其如予何桓魋其如子何似一時一事之言記者小異耳其說皆爲有見述之爲學攷據詳明如漢儒而未嘗墨守舊說而不求其心之安辨析精微如宋儒而未嘗空談虛理而不核乎事之實然勇於自信任意軒輊者亦多他著有易卦圖說一卷五服異同彙考三卷大名水道考一卷聞見雜記四卷知味錄二卷知非集三卷無聞集五卷小草集五卷嘉慶二十一年卒年七十七

胡培暉字載平績溪人祖匡衷字樸蘇歲貢生於經義多所發明不苟與先儒同異著有三禮劄記周禮井田圖考井田出賦考儀禮釋官等書其於井田多申鄭義而授田一事以遂人所言是鄉遂制大司徒所言是都鄙制鄭注自相違戾作畿內授田考實一篇積算特精密其釋官則以周禮禮記左傳國語與儀禮相參證論據精確足補注疏所未及又著有周易傳義疑參十二卷左傳翼服論語古本證異論語補箋莊子集評離騷集注樸齋文集年七十四卒培



鞏嘉慶二十四年進士官內閣中書戶部廣東司主事居官勤而處事密時人稱其治官如治經一字不肯放過絕不受財賄而扶隱指弊胥吏咸憚之假照案發司員失察者數十人惟培鞏及蔡紹江無所汚然猶以隨同畫諾鵠鵠歸里後主講鍾山雲間於涇川一再至並引翼後進爲己任去涇川日門人設飲餞者相望於道篤友誼郝懿行胡承珙遺書皆賴培鞏次第付梓道光二十九年卒年六十八績溪胡氏自明諸生東峰以來世傳經學培鞏涵濡先澤又學於猗陵廷堪遂精三禮初著燕寢考三卷王引之見而喜之既爲儀禮正義上推周公孔子夏垂教之旨發明鄭君賈氏得失旁逮鴻儒經生之所議張皇幽渺闡揚聖緒二千餘歲絕學也其旨見與順德羅惇衍書曰培鞏撰正義約有四例一曰疏經以補注二曰通疏以申注三曰彙各家之說以附注四曰采他說以訂注書凡四十卷至賈氏公彥之疏或解經而違經旨或申注而失注意不可無辨別爲儀禮賈疏訂疑一書宮室制度今以朝制廟制寢制爲綱以天子諸侯大夫士爲目學制則分別庠序館制則分別公私皆先將宮室考定

而已十七篇所行之禮條系於後名宮室提綱陸氏經典釋文於儀禮頗略擬  
取各經音義及集釋文以後各家音切挨次補錄名曰儀禮釋文校補培壘單  
精是書凡四十餘年晚歲患風痺猶力疾從事尚有士昏禮鄉飲酒禮鄉射禮  
燕禮大射儀五篇未卒業而歿門人江寧楊大培從學禮爲補成之他著有禘  
祫問答研六室文鈔大培字雅輪諸生篤學寡交研窮經訓初從元和顧廣圻  
吳縣鈕樹玉遊備聞蒼雅闕奧著說文重文考六卷純以聲音求段借以偏旁  
繁省求古繪異同之變又作五廟考專駁王肅之失江督陶澍以防海議試諸  
生大培洋洋千言大略謂中國官侍客氣居上臨下視洋人若小負販顧彼雖  
好利而越數萬里海洋至此此必非無所挾持者鹵莽行之必生邊鄙時承平  
久人習附和之談獨大培卓識正論侃然無忌諱若豫卜有義律僕鼎查之事  
讀者色變他著論語正義毛詩補注三禮義疏辨正皆佚

劉文淇字孟瞻儀徵人嘉慶二十四年優貢生父錫瑜以幣名世文淇稍長即  
研精古籍貫串羣經於毛鄭賈孔之書及宋元以來通經解詁博覽冥搜折衷

一是尤肆力春秋左氏傳嘗謂左氏之義爲杜注剝蝕已久其稍可觀覽者皆係襲取舊說爰輯左傳舊注疏證一書先取賈服鄭三君之注疏通證明凡杜氏所排擊者糾正之所勦襲者表明之其沿用韋氏國語注者亦一一疏記他如五經異義所載左氏說皆本左氏先師說文所引左傳亦是古文家說漢書五行志所載劉子駿說實左氏一家之學經疏史注御覽等書所引左傳注不載姓名而與杜注異者皆賈服舊說凡若此者皆稱爲舊注而加以疏證其願惠補注及近人專釋左氏之書說有可采咸與登列末始下以己意定其從違上稽先秦諸子下考唐以前史書旁及雜家筆記文集皆取爲證佐期於實事求是俾左氏之大義炳然著明草創四十年長編已具然後依次排比成書爲左氏舊注疏證又謂左傳義疏多襲劉光伯述議隋經籍志及孝經疏云述議者述其義疏議之然則光伯本載舊疏議其得失其引舊疏必當錄其姓名孔穎達左傳疏序祇云據以爲本初非故襲其說至永徽中諸臣詳定乃將舊注姓氏削去襲爲己語因細加剖析成左傳舊疏考正八卷又據史記秦楚之際

月表知項羽曾都江都核其時勢推見割據之迹成楚漢諸侯疆域志三卷據左傳吳越春秋水經注等書謂唐宋以前揚州地勢南高北下且東西兩岸未設隄防與今運河形勢迥不相同成揚州水道記四卷又讀書隨筆二十卷文集十卷詩一卷文淇事親純孝父年篤老目眇侍起居朝夕扶掖寒夜足凍侍親以溫其足舅氏凌曙極貧遺孤毓瑞文淇收育之延同里方巾爲其師並補諸生巾通虞氏易皆其教也卒年六十有六子毓崧字伯山道光二十年舉優貢生從父受經長益致力於學以文淇故治左氏續述先業成春秋左氏傳大義二卷以文淇考證左傳舊疏因承其義例著周易尙書毛詩禮記舊疏考正各一卷又謂六藝未興之先學各有官惟史官之立爲最古不獨史家各體各類并支裔之小說家出於史官卽經子集三部及後世之幕客書吏淵源所仿亦出於史官班氏之志藝文論述史官尙未發斯旨其敘九流以明諸子所出之官必有所授而其中仍有分省失當者既析九流中小說家流歸入史官又辨道家非專出於史官改爲出於醫官又增益者凡三家曰名家出於司士之

官兵家出於司馬之官藝術家出於考工之官統爲十一家博稽載籍窮極根  
要成史乘諸子通義各四卷又經傳通義十卷王船山年譜二卷彭城獻徵錄  
十卷舊德錄一卷通義堂筆記十六卷文集十六卷詩集一卷卒年五十孫壽  
曾字恭甫同治三年光緒二年兩中副榜毓崧主金陵書局爲曾國藩所重毓  
崧卒後招壽曾入局中所刊羣籍多爲校定初文淇治左氏春秋長編晚年編  
輯成疏甫得一卷而文淇沒毓崧思卒其業未果壽曾乃發憤以繼志述事爲  
任嚴立課程至襄公四年而卒年四十五又讀左劄記春秋五十七例表皆治  
左疏時旁推交通發明古誼者他著昏禮重別論對駁義南史校義集評傳雅  
堂集芝雲雜記各若干卷方申字端齋少孤受學於文淇通易著諸家易象別  
錄虞氏易象彙編周易卦象集證周易互體詳述周易卦變舉要

丁晏字栢堂江蘇山陽人阮元爲漕督以漢易十五家發策晏條對萬餘言精  
奧爲當世冠道光元年舉人晏以顧炎武云梅賾僞古文雅密非顧所能爲考  
之家語後序及釋文正義而斷爲王肅僞作蓋肅雅才博學好作僞以難鄭君

鄭君之學昌明於漢肅爲古文孔傳以駕其上後儒誤信之近世惠棟王鳴盛頗疑肅作而未能暢其旨特著論申辨之撰尙書餘論二卷又以胡渭禹貢錐指能知僞古文而不能信好古學踵謬沿譌自逞意見後之學者何所取正既爲正誤以匡其失復采獲古文甄錄舊說砭俗訂譌斷以己意期於發揮經文無取泥古引用前人說各繫姓氏於下輯禹貢集釋三卷生平篤好鄭學於詩箋禮注研討尤深以毛公之學得聖賢之正傳其所稱道與周秦諸子相出入康成申暢毛義修敬作箋孔疏不能尋繹誤謂破字改毛援引疏漏多失鄭旨因博稽互考證之故書雅記義若合符撰毛鄭詩釋四卷康成詩譜宋歐陽氏補亡今通志堂刊本譌脫踳駁援據正義排比重編撰鄭氏詩譜攷正一卷以康成兼采三家詩王應麟有三家詩攷附刊玉海之後外謬錯出世無善本乃蒐采原書校讐是正撰詩攷補注二卷補遺一卷鄭氏注禮至精去古未遠不爲憑虛臆說迄今可考見者如儀禮喪服注多依馬融師說士虞記中月而禫注二十七月依戴禮喪服變除周禮大司樂鼓鼗注依許叔重說與先鄭不同

小背縣鐘磬注二十八枚在一處依劉向五經要義小宗伯注五精帝依劉向五經通義射人注稱今儒家依賈侍中注考工記山以章注作獐依馬季長注禮記檀弓瓦不成味注當作沫依班固白虎通王制大綬小綬注當作綏依劉子政說苑玉藻元端朝日鄭讀爲冕依大戴禮朝事義祭法幽宗雩祭鄭讀爲祭依許氏說文鄭君信而好古原本先儒確有依據凡此釋義補孔之遺闕皆前人未發之祕疏通證明燭若燼火撰三禮釋注共八卷又輯鄭康成年譜畧其堂曰六藝取康成六藝論以深仰止之思然公治經學不掇擊宋儒嘗謂漢學宋學之分門戶之見也漢儒正其詁詁正而義以顯宋儒析其理理明而詁以精二者不可偏廢其於易述程子之傳撰周易述傳二卷於孝經集唐元宗宋司馬光范祖禹之注撰孝經述注一卷尤熟於通鑑故經世優裕嘗與人論鈔幣謂輕錢行鈔必有利而無害論禁洋煙謂不禁則民日以弱中國必疲禁則利在所爭外夷必畔且禁煙當以民命爲重不當計利立法當以中國爲先不當援夷後悉如其言在籍時辦隄工司振務修府城浚市河開通文渠中

支均有功於鄉里咸豐三年粵匪蔓延大江南北督撫檄行府縣練勇積穀爲守禦計淮安以晏主其事旋以事爲人所劾奉旨遣戍黑龍江繳費免行十年擒匪獲淮安北關晏號召團練分布要隘城以獲全十一年以團練大臣晏端書薦敘前守城績由侍讀銜內閣中書加三品銜晏少多疾病迨長讀書養氣日益強固治一書畢方治他書手校書籍極多必徹終始光緒元年卒年八十有二所著書四十七種凡一百三十六卷其已刊者爲頤志齋叢書

王筠字貫山安邱人道光元年舉人後官山西鄉甯縣知縣鄉甯在萬山中民樸事簡訟至立判暇則抱一編不去手權徐溝再權曲沃地號繁劇二縣皆治然亦未嘗廢學筠少喜篆掇及長博涉經史尤長於說文說文之學世推桂段兩家嘗謂桂氏專臆古籍取足達許說而止不下己意惟是引據失於限斷且泛及藻續之詞段氏體大思精所謂通例又前人所未知惟是武斷支離時或不免又謂文字之奧無過形音義二端古人之造字也正名百物以義爲本而音從之於是乎有形後人之識字也由形以求其音由音以考其義而文字之



說備六書以指事象形爲首而文字之樞機即在乎此其字之爲事而作者即據事以審字勿由字以生事其字之爲物而作者即據物以察字勿泥字以造物且勿假他事以成此事之意勿假他物以爲此物之形而後可與倉頡籀斯相質於一堂也今說文之詞足從口木從中鳥鹿足相似從匕苟非後人所竄亂則許君之意荒矣乃標舉分別疏通證明著說文釋例二十卷釋例云者即許書而釋其條例猶杜元凱之於春秋也又以二徐書多涉草略加以李焘亂其次第致分別部居之脈絡不可推尋段玉裁既創爲通例而體裁所拘未能詳備乃采桂段諸家之說著說文句讀三十卷句讀云者用張爾岐儀禮鄧注句讀之名謂漢人經說率名章句此書疏解許說無章可言故曰句讀也鈞治說文之學垂三十年其書獨闢門徑折衷一是不依傍於人論者以爲許氏之功臣桂段之勁敵又有說文繫傳校錄三十卷文字蒙求四卷他著有毛詩重言一卷附毛詩雙聲疊韻說一卷夏小正正義四卷弟子職正音一卷正字略二卷蛾術編再貢正字讀儀禮鄭注句讀刊誤四書說略咸豐四年卒年七十

曾釗字敏修南海人道光五年拔貢生官合浦縣教諭調欽州學正釗篤學好古讀一書必校勘諷字脫文遇秘本或雇人影寫或懷餅就鈔積七八年得數萬卷自是研求經義文字則考之說文玉篇訓詁則稽之方言爾雅雖奧晦難通而因文得義因義得音類能以經解經確有依據入都時見武進劉逢祿逢祿曰篤學若寃士吾道東矣寃士釗號也儀徵阮元督粵震澤任兆麟見釗所校字林以告元元驚異延請課子後開學海堂以古學造士特命釗爲學長獎勸後進嘗因元說日月爲易爲合朔之辨在朔易更發明孟喜卦氣引繫辭懸象莫大乎日月死魄會於壬癸日上下象未濟爲晦時元以爲足發古義宜再暢言之以明孟氏之學因著周易虞氏義箋七卷他著有周禮注疏小箋四卷又詩說二卷又詩毛鄭異同辨一卷毛詩經文定本小序一卷考異一卷音讀一卷虞書命義和章解一卷論語述解一卷讀書雜誌五卷面城樓集十卷釗好講經濟之學二十一年英人焚掠海疆以祁壇還督兩粵番禺舉人陸殿

邦獻議填大石獵德澀滯河道以阻火船墳舉以問釗釗言易稱設險者不恃天塹不藉地利在人相時設之而已入省河道三獵德澀滯皆淺由大石至大黃滯水深數丈三四月夷船從此入當先事防之以固省城城固然後山內達外墳甚難之委釗相度堵塞形勢釗以大石爲第一要區糾南海番禺二縣團勇三萬六千晝夜演練防務遂密二十三年墳謀修復虎門礮臺釗進礮臺形勢議十條已而廉洋賊起墳以釗習知廉州情形委釗與軍事海賊投首咸豐四年卒於家林伯桐字桐君番禺人嘉慶六年舉人生平好爲考據之學宗主漢儒而踐履則服膺朱子無門戶之見事親孝道光六年試禮部歸父已卒悲慟不欲生居喪悉遵古禮蔬食不入內者三年自是不復上公車一意奉母與兩弟友愛教授生徒百餘人咸敦內行勉實學粵督阮元鄧廷楨皆敬禮之元延爲學海堂學長廷楨聘課其二子二十四年以選授德慶州學正閱三年卒於官年七十伯桐於諸經無不通尤深於毛詩謂傳箋不同者大抵毛義爲長孔疏多以王肅語爲毛意又往往混鄭於毛爲毛詩學者當分別觀之庶幾不

失家法因考鄭箋異義爲毛詩通考三十卷又著毛詩傳例二卷又綴其碎義  
瑣辭著毛詩識小三十卷皆極精覈他著有易象釋例十二卷易象雅訓十二  
卷三禮注疏考異二十卷冠昏喪祭儀考十二卷左傳風俗二十卷古音勸學  
三十卷史學蠡測三十卷供冀小言二卷古諺箋十一卷兩粵水經注四卷粵  
風四卷修本堂彙四卷詩文集二十四卷李黼平字繩子嘉應州人幼穎異年  
十四精通樂譜及長治漢學工考證嘉慶十年進士選翰林院庶吉士散館改  
昭文縣知縣洩事一以寬和慈惠爲宗不忍用鞭扑獄隨至隨結公餘即手一  
編民間因有李十五書生之目以虧挪落職繫獄數年乃得歸會粵督阮元開  
學海堂聘閱課藝遂留授諸子經所著毛詩紉義二十四卷道光十二年卒年  
六十三他著有易刊誤二卷文選異義二卷讀杜韓筆記二卷

柳興恩原名興宗字賓叔丹徒人道光十二年舉人受業於儀徵阮元初治毛  
詩以毛公師荀卿荀卿師穀梁穀梁春秋千古絕學元刻皇清經解公羊左氏  
俱有專家而穀梁缺焉乃發憤沈思成穀梁春秋大義述三十卷以鄭六藝論

云穀梁子善於經遂專從善經入手而善經則以屬辭比事爲據事與辭則以春秋日月等名例定之其書凡例謂聖經既以春秋定名而無事猶必舉四時之首月後儒謂日月非經之大例未爲通論穀梁日月之例泥則難通比則易見與其議傳而轉謂經誤不若信經而併存傳說述日月例第一謂春秋治亂於以然禮乃防亂於未然穀梁親受子夏其中典禮猶與論語夏時周冕相表裏述禮例第二謂穀梁之經與左氏公羊異者以百數漢書儒林傳云穀梁魯學公羊乃齊學也此或由齊魯異讀音轉而字亦分述異文第三謂穀梁親受子夏故傳中用孔子孟子說其他暗合者更多述古訓第四謂自漢以來穀梁師授鮮有專家要不得擯諸師說之外述師說第五謂漢儒師說之可見者惟尹更始劉向二家然搜獲寥寥其說已亡而名僅存者自漢以後併治三傳者亦收錄焉述經師第六謂穀梁欠屬孤經茲於所見載籍之涉穀梁者循次摘錄附以論斷並著本經廢興源流述長編第七番禹陳澧嘗爲穀梁箋及條例未成後見興恩書歎其精博遂出其說備采不復作他著有周易卦氣補四卷

虞氏逸象考二卷尙書篇目考二卷毛詩注疏糾補三十卷續王應麟詩地考  
二卷羣經異義四卷劉向年譜二卷儀禮釋宮考辨二卷史記漢書南齊書校  
勘記說文解字校勘記宿壹齋詩文集光緒六年卒年八十有六弟榮宗字翼  
南著有說文引經考異十六卷同時爲穀梁之學者有南海侯康海州許桂林  
嘉善鍾文烝江都梅毓侯康自有傳許桂林字同叔海州人嘉慶二十一年舉  
人少孤孝於母及生母無間言家貧不以厚幣易遠遊日以誥經爲事道光元  
年丁內艱以毀卒年四十三桂林於諸經皆有發明猶篤信穀梁之學著春秋  
穀梁傳時日月書法釋例四卷其書有引公羊而互證者有駁公羊而專主者  
陽湖孫星衍嘗以條理精密論辨明允許之又著易確二十卷大旨以乾爲主  
謂全易皆乾所生博觀約取於易義實有發明別有毛詩後箋八卷春秋三傳  
地名考證六卷漢世別本禮記長義四卷大學中庸講義二卷四書因論二卷  
嘗以其餘力治六書九數著許氏說音十二卷以配說文又著說文後解十卷  
又以岐伯言地大氣舉之氣外無殼其氣將散氣外有殼此殼何依思得一說

以補所未及蓋天質一氣而其根在北北極是也北極不當爲天樞而當爲氣母因采集宣夜遺文以西法通之著宣西通三卷又以算家以簡爲貴乃取欽定數理精蘊撮其切於日用者著算牘四卷生平所著書四十餘種凡百數十卷甘泉羅士琳從之遊後以西算名世鍾文烝字子勤嘉善人道光二十六年舉人候選知縣於學無所不通而其全力尤在春秋因沈潛反覆三十餘年成穀梁經傳補注二十四卷其書網羅衆家折衷一是其未經人道者自比於梅鷟之辨僞書陳第之談古韻略引其緒以待後賢文烝兼究宋元諸儒書書中若釋祿哈祖禰諡法以及心志不通仁不勝道以道受命等皆能提要挈綱實事求是又著論語序詳正一卷卒年六十梅毓字延祖江都人同治九年舉人候選教諭著有穀梁正義長編一卷

陳澧字蘭甫番禺人道光十二年舉人河源縣訓導澧九歲能文復問詩學於張維屏問經學於侯康凡天文地理樂律算術篆隸無不研究中年讀諸經注疏子史及朱子書日有課程初著聲律通考十卷謂周禮六律六同皆文之以

五聲禮記五聲六律十二管還相爲宮今之俗樂有七聲而無十二律有七調而無十二宮有工尺字譜而不知宮商角徵羽懼古樂之遂絕乃考古今聲律爲一書又切韻考六卷外篇三卷謂孫叔然陸法言之學存於廣韻宜明其法而不惑於沙門之說又漢志水道圖說七卷謂地理之學當自水道始知漢水道則可考漢郡縣其於漢學宋學能會其通謂漢儒言義理無異於宋儒宋儒輕蔑漢儒者非也近儒尊漢儒而不講義理亦非也著漢儒通義七卷晚年尋求大義及經學源流正變得失所在而論贊之外及九流諸子兩漢以後學術爲東塾讀書記二十一卷其教人不自立說嘗取顧炎武論學之語而申之謂博學於文當先習一藝韓詩外傳曰好一則博多好則雜也非博也讀經史子集四部書皆學也而當以經爲主尤當以行己有恥爲主爲學海堂學長數十年至老主講菊坡精舍與諸生講論文藝勉以篤行立品成就甚衆光緒七年粵督張樹聲巡撫裕寬以南海朱次琦與澧皆耆年碩德奏請褒異給五品卿銜八年卒年七十三他著有說文聲表十七卷水經注提綱四十卷水經注西



南諸水考三卷三統術詳說三卷弧三角平視法一卷琴律譜一卷中范一卷  
幕印述一卷東塾集六卷侯康字君謨亦番禺人道光十五年舉人少孤事母  
孝家貧欲買書母稱貸得錢買十七史讀之卷帙皆敝遂通史學及長精研注  
疏湛深經術與同里陳澧交最久嘗謂漢志載春秋古經十二篇者左經也經  
十一卷者公穀經也今以三傳參校之大要古經爲優穀梁出最先其誤尙真  
公羊出最晚其誤滋甚乃取其義意可尋者疏通證明之著春秋古經說二卷  
又治穀梁以證三禮以公羊雜出衆師時多偏駁排詆獨多著穀梁禮證未完  
帙僅成二卷又仿裴松之注三國志例注史嘗曰注古史與近史異注近史者  
羣書大備注古史者遺籍罕存當日爲唾棄之餘今日皆見聞之助宜過而存  
之因爲後漢書補注續一卷三國志補注一卷後漢稱續者以有惠棟注三國  
志杭世駿注未完善故不稱續也又補後漢三國藝文志各成經史子四卷餘  
未成又考漢魏六朝禮儀貫串三禮著書數十篇澧嘗歎以爲精深浩博十七  
年卒年四十四弟度字子琴與康同榜舉人以大挑知縣分發廣西署河池州知

州廣西賊起度伐木爲柵因山勢聯絡堅固可守賊退以病告歸至家遂卒年五十七度治熟經傳尤長禮學時稱二侯嘉興錢儀吉嘗稱其研覈傳注剖析異同如辨鬻伯惠伯之爲父子三老五更之爲一人證明鄭義皆有據依所著書爲夷寇所焚其說經文刻學海堂集中桂文燦字子白文燿之弟道光二十年舉人同治二年正月應詔陳言曰嚴甄別以清仕途曰設幕職以重考成曰分三途以勵科甲曰裁孱弱以節糜費曰鑄銀錢以資利用若津貼京員製造輪船海運演銅先後允行光緒九年選湖北鄖縣知縣善治獄以積勞卒於任文燦守阮元遺言謂周公尙文範之以禮尼山論道教之以孝苟博文而不能約禮明辨而不能篤行非聖人之學也鄭君朱子皆大儒其行同其學亦同因著朱子述鄭錄二卷他著四書集注箋四卷毛詩釋地六卷周禮通釋六卷經學博采錄十二卷

鄭珍字子尹遵義人道光五年拔貢生十七年舉人以大挑二等選荔波縣訓導咸豐五年叛苗犯荔波知縣蔣嘉穀病珍率兵拒戰卒完其城苗退告歸同

治二年大學士祁寯藻薦於朝特旨以知縣分發江蘇補用卒不出三年卒年五十九珍初受知於歙縣程恩澤乃益進求諸聲音文字之原與古宮室冠服之制方是時海內之士崇尚攷據珍師承其說實事求是不立異不苟同復從莫與儔游益得與聞國朝六七鉅儒宗旨於經最深三禮謂小學有三曰形曰聲曰義形則三代文體之正具在說文若歷代鐘鼎款識及汗簡古文四聲韻所收奇字既不盡可識亦多僞造不合六書不可以爲常也聲則崑山顧氏音學五書推證古音信而有徵昭若發蒙誠百世不祧之祖義則凡字書韻書訓詁之書浩如煙海而欲通經訓莫詳於段玉裁說文注邵晉涵郝懿行爾雅疏及王念孫廣雅疏證貫串博衍超越前古是皆小學全體大用其讀禮經恆苦乾嘉以還積漸生弊號宗高密又多出新義未見有勝說愈繁而事愈蕪故言三禮墨守司農不敢苟有出入至於諸經率依古注爲多又以餘力旁通子史類能提要鉤玄儀禮十七篇皆有發明半未脫稿所成儀禮私箋僅有士昏公食大夫喪服士喪四篇凡八卷而喪服一篇反覆尋繹用力尤深又以周禮攷

工記輪輿鄭注精微自賈疏以來不得正解說者日益支蔓成輪輿私箋三卷尤長說文之學所著說文逸字二卷附錄一卷說文新附考六卷皆見稱於時他著有臯氏圖說深衣考汗簡箋正說隸等書又有巢經巢經說詩鈔文鈔明鹿忠節公無欲齋詩注鄒漢助字叔積新化人父文蘇歲貢生以古學教授鄉里闢學舍曰古經堂與諸生肄士禮其中其考據典物力尊漢學而談心性則宗朱子漢助通左氏義佐伯兄漢紀撰左氏地圖說又佐仲兄漢潢撰羣經百物譜年十八九撰六國春秋於天文推步方輿沿革六書九數靡不研究同縣鄧顯鶴深異之與修寶慶府志又至黔中修貴陽大定興義安順諸郡志成豐元年舉於鄉訪魏源於高郵同撰堯典釋天一卷會粵賊陷江甯漢助以援堵守三策上書曾國藩謂不援江西堵廣西湖南亦不能守國藩用其言命偕江忠淑率楚勇千人援南昌圍解敘勞以知縣用既從江忠淑於廬州守大西門賊爲隧道三攻之城圯數丈賊將登陴漢助擊卻之堅守三十七日地雷復發城陷漢助坐城樓上命酒自酌持劍大呼殺賊賊至與格鬪手刃數人力竭死

之年四十九贈道銜所著讀書偶識三十六卷自言破前人之訓故必求唐前之訓故方敢用違箋傳之事證必求漢前之事證方敢從以漢人去古未遠諸經注皆有師承故推闡漢學不遺餘力尤深音均之學初著廣韻表十卷晚爲五均論說尤精粹時以江戴目之生平於易詩禮春秋論語說文水經皆有撰述凡二十餘種合二百餘卷同治二年土匪焚其居燬焉今存者讀書偶識僅八卷五均論二卷顓頊秣考二卷數菽齋文三卷詩一卷紅崖石刻釋文一卷南高平物產記二卷王崧字樂山浪穹人嘉慶四年進士山西武鄉縣知縣崧學問淹通儀徵阮元總督雲貴延崧主修通志著有說緯六卷

劉寶楠字楚楨寶應人父履恂字迪九乾隆五十一年舉人國子監典籍著有秋槎札記寶楠生五歲而孤母氏喬教育以成始寶楠從父台拱漢學精深寶楠請業於台拱以學行聞鄉里爲諸生時與儀徵劉文淇齊名人稱揚州二劉道光二十年成進士授直隸文安縣知縣文安地稱窪下隄堰不修遇伏秋水盛漲輒爲民害寶楠周履隄防詢知疾苦爰檢舊冊依例督旗屯及民同修而

旗屯恆估勞相觀望寶楠執法不阿功遂濟再補元氏會歲旱縣西北境蝗災延二十餘里寶楠禱東郊蜡祠蝗爭投阡井或抱禾死歲則大熟咸豐元年調三河值東省兵過境故事兵車皆出里下寶楠謂兵多差重非民所堪願車應差給以民價民得不擾寶楠在官十六年衣冠樸素如諸生時勤於聽訟官文安日審結積案千四百餘事雞初鳴坐堂皇兩造具備當時研鞫事無鉅細均如其意結案悖者照例治罪凡涉親故族屬訟者諭以睦婣概令解釋訟獄既簡吏多去籍歸耕遠近翕然著循良稱咸豐五年卒年六十五寶楠於經初治毛氏詩鄭氏禮後與劉文淇及江都梅植之涇包慎言丹徒柳興恩句容陳立約各治一經寶楠發策得論語病皇邢疏蕪陋乃蒐輯漢儒舊說益以宋人長義及近世諸家仿焦循孟子正義例先爲長編次乃薈萃而折衷之著論語正義二十四卷因官事繁未卒業命子恭冕續成之他著有釋穀四卷於豆麥麻三種多補正程氏九穀考之說漢石例六卷於碑志體例考證詳博寶應圖經六卷勝朝殉揚錄三卷文安隄工錄六卷恭冕字叔俛光緒五年舉人守家學

通經訓入安徽學政朱蘭幕爲校李貽德春秋賈服注輯述移補百數十事後主講湖北經心書院敦品飭行崇尚樸學幼習毛詩晚年治公羊春秋發明新周之義闢何劭公之謬說同時通儒皆躋之卒年六十著有論語正義補何休論語注訓述廣經室文鈔

龍啟瑞字翰臣臨桂人道光二十一年一甲一名進士授翰林院修撰二十四年充廣東鄉試副考官二十七年大考翰詹二等七名以侍講升用七月簡湖北學政著經籍舉要一書以示學者又以學政之職有三要一曰防弊二曰厲實學三曰正人心風俗三十年丁父憂回籍咸豐元年六月廣西巡撫鄒鳴鶴奏辦廣西團練以啟瑞總其事二年七月省城圍解以守城出力以侍講學士升用六年四月授通政司副使十一月簡江西學政七年三月遷江西布政使八年九月卒於官啟瑞切劘經義尤講求音韻之學貫穿於顧江段王孔張劉江諸家之書而著古韻通說二十卷以爲論古韻者自顧氏以前失之疏自段氏以後過於密江氏酌中亦未爲盡善陽湖張氏分二十一部言凡言古韻者

分之不嫌密合之不嫌廣惟分之密其合之也脈絡分明不至因一字而疑各韻可通亦不至因各韻而疑一字之不可通啓瑞服膺是言故其集古韻也意主於嚴而其爲通說也則較之顧氏而尙覺其寬不拘成說不執私見參之古書以求其是而已其論本音論通韻論轉音皆確有據依而以論通說總之故以名其全書焉他著有爾雅經注集證三卷經德堂集十二卷苗夔字仙麓肅甯人幼即嗜六書形聲之學讀許氏說文若有夙悟已又得顧炎武音學五書慕之彌篤曰吾守此終身矣舉道光十一年優貢生高郵王念孫父子禮先於夔由是譽望日隆夔以爲許叔重遺書多有爲後人妄刪或附益者乃訂正說文八百餘字爲說文聲訂二卷顧氏音學所立古音表十部宏綱已具然猶病其太密而戈麻旣雜西音不應別立一部於是併耕清青蒸登於東冬併戈麻於支齊定以七部隳括羣經之韻字以聲從韻以部分爲說文聲讀表七卷詩白毛傳鄭箋而後主義理者多主聲均者少雖有陸元朗詩經音義亦不能專主古音然古音時有未盡改者夔治毛詩尤精於諧聲之學嘗以齊魯韓三家



證毛而又以許浚長之聲韻參錯其間采太平戚氏之漢學諧聲詩經正讀無錫安氏之均徵爲毛詩均訂十卷咸豐丁巳五月卒年七十有五龐大堃字子方常熟人嘉慶二十四年舉人究心音韻之學嘗謂顧江戴段孔王諸家分部互有出入者以入聲配隸無準耳入聲有正紐反紐今韻多從正紐古韻多從反紐陽奇陰偶兩兩相配一從陸氏法言所定爲正紐一從顧江戴王所定爲反紐其轉音之法有五一正轉同部者是也一遞轉同音者是也一旁轉相比及相生者是也一雙聲同母者是也又謂欲明古音必先究唐韻乃可定其分合爲唐韻輯略五卷備考一卷形聲輯略一卷備考一卷古音輯略二卷備考一卷等韻輯略三卷他著有易例輯略五卷

陳立字卓人句容人道光二十一年進士二十四年補應殿試選翰林院庶吉士散館改刑部主事升郎中授雲南曲靖府知府請訓時文宗有爲人清慎之譽時以道梗不克之任少客揚州師江都梅植之受詩古文辭師江都凌曙儀徵劉文淇受公羊春秋許氏說文鄭氏禮而於公羊致力尤深文淇嘗謂漢儒

之學經唐人作疏其義益晦徐彥之疏公羊空言無當近人如曲阜孔氏武進劉氏謹守何氏之說詳義例而略典禮訓詁立乃博稽載籍凡唐以前公羊古義及國朝諸儒說公羊者左右采獲擇精語詳草創三十年長編甫具南歸後乃整齊排比融會貫通成公羊義疏七十六卷初治公羊也因及漢儒說經師法謂莫備於白虎通先爲疏證以條舉舊聞暢隱扶微爲主而不事辨駁成白虎通疏證十二卷幼受爾雅因取唐人五經正義中所引健爲舍人樊光劉歆孫炎五家悉甄錄之謂郭注中精言妙諦大率胎此附以郭音義及顧沈施謝諸家切釋成爾雅舊注二卷又以古韻之學敝蝕已久而聲音之原起於文字說文諧聲卽韻母也因推廣歸安姚氏說文聲系之例刺取許書中諧聲之文部分而綴敘之以象形指事會意爲母以諧聲爲子其子之所諧又卽各綴於子下其分部則兼取顧江戴孔王段劉許諸家精研而審核之訂爲二十部成說文諧聲學生述三卷其文淵雅典碩大抵考訂服制典禮及聲音訓詁爲多成句溪雜著六卷卒年六十一

陳奐字碩甫長洲人諸生咸豐元年舉孝廉方正奐始從吳江沅治古學金壇段玉裁馮吳與沅祖聲善嘗曰我作六書音韻表惟江氏祖孫知之餘豈有知者奐盡一晝夜探其梗概沅嘗假玉裁經韻樓集奐竊視之加朱墨後玉裁見之稱其學識出孔賈上由是奐受學玉裁高郵王念孫暨子引之棲霞郝懿行績溪胡培暉涇胡承珙臨海金鶚咸與締交奐嘗言大毛公詁訓傳言簡意該遂殫精竭慮專攻毛傳以毛傳一切禮數名物自漢以來無人稱引韜晦不彰乃博徵古書發明其義大抵用西漢以前舊說而與東漢人說詩者不苟同又以毛氏之學源出荀子而善承毛氏者惟鄭仲師許叔重兩家故於周禮注說文解字多所取說著詩毛氏傳疏三十卷又以疏中稱引博廣難明更舉條例立表示圖爲毛詩說一卷準以古音依四始爲毛詩音四卷放爾雅例編毛傳爲義類十九篇一卷以鄭多本三家詩與毛異爲鄭氏箋考徵一卷又有詩語助義三十卷公羊逸禮考徵一卷師友淵源記一卷禘郊或問宋本集韻校勘記各若干卷其論尙書大傳與毛傳同條共貫論春秋之學從公羊以知例治

穀梁以明禮穀梁文句極簡必得治禮數十年而後可明其要義論釋名與毛傳說文多不台然可以討漢宋說經家之沿流其論丁度集韻云集韻總字具見類篇先以類篇校集韻再參之釋文說文玉篇廣韻博雅則校讐之功過半矣又云陸氏釋文宋本當於集韻求之今尙書釋文經開寶中陳諤等刪改之本集韻則未經刪改者也於子書中尤好管子嘗令其弟子元和丁士涵爲管子案四卷家居授徒從游者數十人同郡管慶祺丁士涵馬釗費錫德清戴望其尤著也同治二年卒年七十有八金鶚字誠齋臨海人優貢生博聞強識邃精三禮之學受知於山陽汪廷珍與析難辨論成禮說二卷嘉慶二十四年卒於京邸所著求古錄一書取宮室衣服郊祀井田之類貫串漢唐諸儒之說條考而詳辨之鶚又嘗輯論語鄉黨注釐正舊說頗得意解卒後稿全佚陳奐求得之釐爲求古錄禮說十五卷鄉黨正義一卷

黃式三字薇香定海人歲貢生事親孝嘗赴鄉試母喪暴疾卒於家馳歸慟絕父老且病臥牀第數年衣食齷洗必躬親之比歿持喪以禮誓不再應鄉試於

學不立門戶博綜羣經治易治春秋而尤長三禮論禘郊宗廟謹守鄭學論封域井田兵賦學校明堂宗法諸制有大疑義必釐正之其復禮說崇禮說約禮說嘗著論語後案二十卷自爲之序他著有書啟幃四卷詩叢說一卷詩序說通二卷詩傳箋考二卷春秋釋二卷周季編略九卷傲居集經說四卷史說四卷同治元年卒年七十四子以周從子以恭俱能傳其學以周本名元同後改今名以元同爲字同治九年優貢旋舉於鄉大挑以教職用補分水縣訓導以學臣奏加中書銜以教授升用旋選處州府教授而年已七十遂不就以周篤守家學以爲三代下之經學漢鄭君宋朱子爲最而漢學宋學之流弊乖離聖經尙不合於鄭朱何論孔孟有清講學之風倡自顧亭林顧氏嘗云經學卽是理學乃體顧氏之訓上追孔孟之遺言於易詩春秋皆有著述而三禮尤爲宗主所著禮書通故百卷列五十目古先王禮制備焉又以孟子學孔子由博反約而未嘗親炙孔聖其間有子思子綜七十子之前聞承孔聖以啓孟子乃著子思子輯解七卷而舉子思所述夫子之教必始於詩書而終於禮樂及所明

仁義爲利之說謂其傳授之大情是深信博文約禮之經學爲行義之正軌而求孟子學孔聖之師承以子思爲樞軸暮年多疾因曰加我數年子思子輯解成斯無憾既書成而疾瘥更號哉生江蘇學政黃體芳建南菁講舍於江陰延之上講以周教以博文約禮實事求是道高而不立門戶宗源瀚建辨志精舍於甯波請以周定其名義規制而專課經學著錄弟子千餘人卒年七十有二以恭字質庭光緒元年舉人著有尙書啟轅疏二十八卷讀詩管見十二卷

俞樾字蔭甫德清人道光三十年進士改庶吉士咸豐二年散館授編修五年簡放河南學政奏請以鄭公孫僑從祀文廟聖兄孟皮配享崇德祠並邀俞允七年以御史曹登庸劾試題割裂能職樾歸後僑居蘇州主講蘇州紫陽上海求志各書院而主杭州詒經精舍三十餘年最久課士一依阮元成法游其門者若戴望黃以周朱一新施補華王詒壽馮一梅吳慶坻吳承志袁昶等咸有聲於時東南遭赭寇之亂典籍蕩然樾總辦浙江書局建議江浙揚鄂四書局分刻二十四史又於浙局精刻子書二十二種海內稱爲善本生平專意著述

先後著書卷帙繁富而羣經平議諸子平議古書疑義舉例三書尤能確守家法有功經籍其治經以高郵王念孫引之父子爲宗謂治經之道大要在正句讀審字義通古文假借三者之中通假借爲尤要王氏父子所著經義述聞用漢儒讀謂讀曰之例者居半發明故訓是正文字至爲精審因著羣經平議以附述聞之後其諸子平議則仿王氏讀書雜誌而作校誤文明古義所得視羣經爲多又取九經諸子舉例八十有八每一條各舉數事以見例使讀者習知其例有所據依爲讀古書之一助越於諸經皆有纂述而易學爲深所著易貫專發明聖人觀象繫辭之義玩易五篇則自出新意不拘泥先儒之說復作良官易說卦氣值日考續考邵易補原易窮通變化論互體方位說皆足證一家之學晚年所著茶香室經說義多精確古文不拘宗派淵然有經籍之光所作詩溫雅近白居易工篆隸同時如大學士曾國藩李鴻章尙書彭玉麟徐樹銘潘祖蔭咸傾心納交日本文士有來執業門下者越湛深經學律已尤嚴篤天性尙廉直布衣蔬食海內翕然稱曲園先生光緒二十八年以鄉舉重逢

詔復原官重赴鹿鳴筵宴三十二年卒年八十有六著有羣經平議三十五卷諸子平議三十五卷及第一樓叢書曲園雜纂愈樓雜纂寶萌集春在堂雜文詩編詞錄隨筆右台仙館筆記茶香室叢鈔經說其餘雜著稱春在堂全書同時以耆年篤學主講席者則有南匯張文虎文虎字嘯山諸生嘗讀元和惠氏歛江氏休寧戴氏嘉定錢氏諸家書慨然歎爲學自有本則取漢唐宋注疏經說由形聲以通其字由訓詁以會其義山度數名物以辨其制作由語言事蹟以窺古聖賢精義旁及子史莫不攷其源流同異精天算尤長校勘同治五年兩江書局開文虎爲校史記三注成札記五卷最稱精善卒年七十有一著有舒藝室遺書

王闓運字壬秋湘潭人咸豐三年舉人幼好學質魯日誦不能及百言發憤自責勉強而行之所習者不成誦不食夕所誦者不得解不寢於是年十有五明訓詁二十而通章句二十四而言禮攷三代之制度詳品物之所用二十八而達春秋微言張公羊申何學遂通諸經潛心著述尤肆力於文溯莊列探賈



董其璘儼則揖顏庾詩歌則抗阮左記事之體一取裁於龍門閣運刻苦勵學寒暑無間經史百家靡不誦習箋注抄校日有定課遇有心得隨筆記述闡明與義中多前賢未發之覆嘗曰治經於易必先知易字有數義不當虛衍卦名於書必先斷句讀於詩必先知男女贈答之辭不足以頒學官傳後世一洗三陋乃可言禮禮明然後治春秋又曰說經以識字爲貴而非識說文解字之字爲貴又曰文不取裁於古則亡法文而畢摹乎古則亡意又嘗慨然自歎曰我非文人乃學人也學成出遊初館山東巡撫崇恩入都就尙書肅順聘肅順奉之若師保軍事多諮而後行左宗棠之獄閣運實解之已而參曾國藩幕胡林翼彭玉燾等皆加敬禮閣運自負奇才所如多不合乃退息無復用世之志唯出所學以教後進四川總督丁寶楨聘主尊經書院待以賓師之禮成材甚衆歸爲長沙思賢講舍衡州船山書院山長江西巡撫夏時延爲高等學堂總教光緒三十四年湖南巡撫岑春煢上其學行特授檢討鄉試重逢加侍讀閣運晚睹世變與人無忤以唯阿自容入民國嘗一領史館遂歸丙辰年卒年八十

有五所著書以經學爲多其已刊者有周易說十一卷尙書義三十卷尙書大傳七卷詩經補箋二十卷禮記箋四十六卷春秋公羊傳箋十一卷穀梁傳箋十卷周官箋六卷論語注二卷爾雅集解十六卷又墨子莊子鵲冠子義解十一卷湘軍志十六卷湘綺樓詩文集及日記等子女並能通經傳其家學次子代豐早世著有公羊例表

王先謙字益吾長沙人同治四年進士選庶吉士授編修光緒元年大考二等擢中允充日講起居注官歷上疏言言路防弊請籌東三省防務並劾雲南巡撫徐之銘六年晉國子監祭酒八年丁憂歸服闋仍故官疏請三海停工出爲江蘇學政十四年以太監李蓮英招搖疏請懲戒略言宦寺之患自古爲昭本朝法制森嚴從無太監攬權害事皇太后垂簾聽政一票前謨毫不寬假此天下臣民所共知共見者乃有總管太監李蓮英秉性好回肆無忌憚其平日穢聲劣迹不敢形諸奏牘惟思太監等給使宮禁得以日近天顏或因奔走徼長偶邀宸顧度亦事理所有何獨該太監誇張恩遇大肆招搖致太監篋小李之

名傾動中外驚駭物聽此即其不安本分之明證易曰履霜堅冰漸也皇太后皇上於制治保邦之道靡不勤求夙夜遇事防維今宵小橫行已有端兆若不嚴加懲辦無以振綱紀而肅羣情疏上不報先謙歷典雲南江西浙江鄉試搜羅人才不遺餘力既涖江蘇先奏設書局仿阮元皇清經解例刊刻續經解一千四百二十卷南菁書院創於黃體芳先謙廣籌經費每邑拔取才士入院而督教之誘掖獎勵成就人材甚多開缺還家厯主思賢講舍巖麓城南兩書院其培植人才與前無異三十三年總督陳夔龍巡撫岑春煇奏以所著書進呈賞內閣學士銜宣統二年長沙饑民閔圍撫署衛兵開槍擊斃數人民情愈憤匪徒乘之放火燒署省城紳士電請易巡撫以先謙名首列先謙不知也總督瑞澂奏參部議降五級同鄉京官胡祖蔭等以冤抑呈遞都察院亦不報國變後改名遜遷居鄉間越六年卒著有尙書孔傳參正三十六卷三家詩集義疏二十八卷漢書補注一百卷荀子集解二十卷日本源流考二十二卷外國通鑑三十卷虛受堂詩文集三十六卷等

孫詒讓字仲容瑞安人父衣言自有傳詒讓同治六年舉人官刑部主事初讀漢學師承記及皇清經解漸窺通儒治經史小學家法謂古子羣經有三代文字之通假有秦漢篆隸之變遷有魏晉正草之混淆有六朝唐人俗書之流失有宋元明校讐之屬改匡違拮佚必有誼據先成札迻十二卷又著周禮正義八十六卷以爲有清經術昌明於諸經均有新疏周禮以周公致太平之書而秦漢以來諸儒不能融會貫通蓋通經皆實事實字天地山川之大城郭宮室衣服制度之精酒漿醴醢之細鄭注簡奧賈疏疏略讀者難於深究而通之於治尤多謬鑿劉歆蘇綽之於新周王安石之於宋膠柱鼓瑟舟一潰不振遂爲此經詬病詒讓乃於爾雅說文正其訓詁以禮經大小戴記證其制度研擇廿載藥草屢易遂博采漢唐以來迄乾嘉諸經儒舊說參互譯證以發鄭注之淵奧裨賈疏之遺闕其於古制疏通證明較之舊疏實爲淹貫而注有悟違輒爲匡糾凡所發正數十百事匪敢壞疏不破注家法於康成不曲從杜鄭之意實亦無諄而以國家之富強從政教入則無論新舊學均可折衷於是書識者韙之

光緒癸卯以經濟特科徵不應宣統元年禮制館徵亦不就未幾卒年六十二  
所著又有墨子閒詁十五卷目錄附錄二卷後語二卷精深閎博一時推爲絕  
詣古籀拾遺三卷逸周書輯補四卷九旗古義述一卷

鄭杲字東甫遷安人父鳴岡爲即墨令卒於官貧不能歸因家焉杲事母孝光  
緒五年舉山東鄉試第一明年成進士授刑部主事肆力於學以讀經爲正課  
旁及朝章國故矻矻終日視仕進泊如也嘗謂治經在信古傳經者淵海傳其  
航也漢氏諸儒主乎此者不能通乎彼唐宋而降能觀其通矣乃舉古說而悉  
排之惟斷以己意若是者皆非善治經者也杲以母憂歸主講濼源書院服闋  
選員外時朝政維新兩宮已積疑釁杲獨惓惓言天子當竭誠以盡孝道具疏  
草莫敢爲言者二十六年夏癸感入南斗復上書請修省不報未幾卒杲之學  
深於春秋其言曰左氏明魯史舊章二傳則孔孟推廣新意口授傳指公羊明  
魯道者也穀梁明王道者也左氏則備載當時行用之道當時行用之道霸道  
也所以必明魯道者爲人子孫道在法其祖也穀梁則損益四代之趣咸在焉

惟聖人蹶起在帝位者乃能用之也其爲說兼綜三傳而尤致嚴於事天事君事親之辨謂春秋首致謹於元年正月正月者正即位也正月謹始也必能爲父之子然後能爲天之子矣春秋之有三正由其有天君父之三命也春者天也王者君也正月者父也將以備責三正而單舉正月何也事天事君皆以事親爲始也凡臬所論著如此與臬同時者有宋書升字晉之濰縣人光緒十八年進士改庶吉士里居十年殫心經術易書詩均有撰述尤精推步之學法偉堂字小山膠州人光緒十五年進士官青州府教授精研音韻之學考訂陸德明經典釋文多前人所未發

清史稿

儒林傳四

孔蔭植

孔蔭植字對寰孔子六十五代孫世居曲阜明天啟初襲封衍聖公清順治元年世祖定鼎京師山東巡撫方大猷疏言開國之初首宜尊崇先聖下禮部議衍聖公爵及其官屬悉循明舊制蔭植朝京師遣官迎勞入朝班列大學士上賜宴恩禮有加四年卒遣山東布政使致祭子興變襲興變字起呂時年十三生母陶撫以成立稍長事母甚孝凝重有器識飭廟庭修禮樂諸廢悉舉累加少保兼太子太保康熙六年卒子毓圻襲毓圻字鐘在方幼年十一朝京師聖祖召見瀛臺禮度如成人奏對稱旨越二年上幸學召毓圻陪祀太皇太后召入見賜坐問家世具以對賜茶及克食辭出命內臣送至宮門外傳諭從官善輔翼之上御殿毓圻從諸大臣朝參及退命自御道行遶巡辭上敦諭之乃趨出加太子少師二十三年上東巡釋奠孔子廟留曲柄黃蓋謁林周覽遺跡每

事問毓圻謹以對因請擴林地置守衛除租賦設百戶官秩視衛守備皆許之  
毓圻輯幸魯盛典以進復奏請重修孔子廟白巡撫及河道總督免縣人河工  
應役雍正元年世宗命追封先聖五代王爵十月毓圻詣闕謝疾作上命醫診  
視賜參餌十一月卒於京師上遣內大臣奠茶酒喪歸命皇三子及莊親王允  
祿臨奠行人護行賜葬設恭愍毓圻工書愛蘭自號曰蘭堂子傳鐸襲傳鐸字  
振路康熙間賜二品冠服襲爵後一年世宗幸學召傳鐸陪祀傳鐸老病足命  
其子繼溥代行禮六月孔子廟災傳鐸用明弘治間故事率族人素服三日哭  
疏引咎上遣侍郎王景曾祭告並傳旨慰問尋發帑重建命侍郎留保會巡撫  
岳溶前巡撫陳世倌庀工役而以傳鐸董其事詔詢傳鐸有當增設者言無隱  
因請增設樂器庫直房上許之八年廟成九年上命修孔林仍與世倌監理疾  
作乞休上允之子繼溥前卒命以孫廣榮襲十年孔林工竟復開館輯闕里盛  
典十三年卒賜祭葬傳鐸工詩詞有集廣榮字京立雍正初授二品冠服襲爵  
以孔林工竟率族人詣闕謝上御圓明園正大光明殿召入對命坐賜茶諭曰



汝爲先聖後當存聖賢心行聖賢事秉禮守義以驕奢爲戒汝年方少尤宜勤學讀書敦品勵行與汝族人相勸戒相砥礪爲端人正士廣榮頓首謝賜松花江石硯及錦幣賜宴遣歸十三年世宗崩入臨高宗復召入對以覃恩贈父繼溥如其爵三年上幸學召廣榮陪祀獻親耕藉田頌視學大禮慶成賦四年朝京師祝上萬壽會舉經筵令侍班因奏請著爲令六年疏勅曲阜知縣毓琚不職毓琚亦許廣榮居鄉不法下巡撫按治上原廣榮而譴毓琚八年卒子昭煥襲昭煥字顯明十三年正月上東巡釋奠孔子廟御詩禮堂昭煥方幼命其族人舉人繼汾等進講是日並謁林還復留曲柄黃蓋賜昭煥宴賚書籍文綺貂幣官繼汾中書族人有官者皆進秩親製孔子廟碑勒石大成門外二十一年昭煥疏言皇莊戶丁蒙恩免役歷來地方官額外雜派每事調劑非易請酌留五十戶餘改歸民籍交地方官編審應役上諭曰昭煥疏言皇莊此必沿前代舊習然亦止應稱官莊子不云乎甚矣山之行詐無臣而爲有臣昭煥可謂不能讀其祖書矣此時丁銀已停徵地方官安得更令百姓應役且取役何事若

爲朕東巡修道則皆發帑雇役初未累百姓朕展謁先師衍聖公督令廟戶除道清產理所應爾豈當轉庇廟戶並發帑雇役亦不肯應耶下吏議當奪爵上命寬之以昭煥年少歸咎繼汾及其兄繼涑皆譴黜三月上東巡釋奠孔子廟謁林二十二年上奉皇太后東巡釋奠三十六年復東巡釋奠既還京師出內府所藏周銅器木鼎亞尊犧尊伯彝册山螭夔敦寶簋夔鳳豆饗簋四足高几十事置廟庭四十一年兩金川平三月復奉皇太后東巡釋奠告成功次日謁林四十八年昭煥卒子憲培襲憲培字養元乾隆五十九年卒子慶鎔襲慶鎔字陶甫道光二十一年卒子繁灝襲繁灝字文淵同治二年卒設端恪子祥珂襲祥珂字覲堂光緒三年卒設莊愨子令貽襲令貽字毅孫國變後襲爵奉祀如故當唐末五季以文宣公兼曲阜令宋用孔氏支子明至清初因之自毓琚與廣榮互許坐罷官廷議以衍聖公咨送易涉私孔氏子領鄉縣所隸皆親屬審斷亦未能悉公擬更前例御史衛廷璞疏言宜仍舊貫鴻臚寺卿林令旭又請以衢州孔氏子孫爲曲阜知縣下廷臣議用廷璞言仍令衍聖公咨送巡

撫考試題補後十餘年巡撫白鍾山奏請改題缺上諭曰闕里毓聖之鄉唐宋以來率以聖裔領縣事大宗主鬯爵列上公而知縣以民事爲職奉法令則以裁制傷恩厚族黨則以偏私廢事非古易地而官之道當如鍾山議仍別設世襲六品官選孔氏子充補明制五經博士孔氏南宗一人奉衢州孔子廟祀北宗一人奉述聖祀顏氏復聖後曾氏宗聖後孟氏亞聖後仲氏子政後各一人道州周氏元公後江甯嵩縣程氏皆正公後洛陽邵氏康節後建安婺源朱氏皆文公後各一人清因之又增設咸陽姬氏文公後曲阜東野氏周公後濟甯閔氏子騫後濬縣端木氏子貢後常熟言氏子游後鉅野卜氏子夏後蕭縣顓孫氏子張後荷澤肥城兩冉氏伯牛仲弓後肥城有氏有子後鄒平伏氏伏生後孟縣韓氏文公後鄆縣張氏明公後各一人而程氏改純公後一人又崇關侯祀事亦錄其後洛陽解州江陵各一人明史衍聖公附儒林傳後今仿其例並五經博士有增設者亦附焉

清史稿

列傳

文苑

清代學術超漢越宋論者至欲特立清學之名而文學並重亦足於漢唐宋明以外別樹一宗嗚呼盛已明末文衰甚矣清運既興文氣亦隨之而一振謙益歸命以詩文雄於時足負起衰之責而魏侯申吳山林遺逸隱與推移亦開風氣之先康乾盛治文教大昌聖主賢臣莫不以提倡文化爲己任師儒崛起尤盛一時自王朱以及方俔各擅其勝文運盛衰實通世運此當舉其全體若必執一人一地言之轉失之隘豈定論哉道咸多故文體日變龔魏之徒乘時立說同治中興文風又起曾國藩立言有體濟以德功實集其大成光宣以後支離龐雜不足言文久矣茲爲文苑傳但取詩文有名能自成家者彙爲一編以著有清一代文學之盛派別異同皆置勿論其已見大臣及儒林各傳者則不復著焉

文苑一



喬萊

汪 忠 顯

龐垲

潘 達 賓

孫枝蔚

李 念 慈

黃與堅

顧 王 訓 吳

梅清

梅 庚

姜宸英

吳 履 廣 傑 仲

文昭

黃 嗣 淵 水 清 淵 亮 瑞 水 文

黃儀

鄭 元 慶

史申義

周 廷 簡 顧 元 際

何焯

陳 景 宏 戴 嘉 子 真 中

陸棻

兄 子 登 勳

陸圻

丁 澎 吳 俊 百 紹 炳 沈 毛 先 舒 城 蘇 真 衍 文

丁焯

黃 林 任 嗣 鄧 林 方 信 坤

吳雯

陶 季

馮景

鄧 其 翰

性德

商 齊 貞 觀 項 鴻 貞

趙執信

馮 廷 雙 賢

查慎行

查 慎 行 查 慎 行

顧陳埈

戴名世

魏禧字冰叔甯都人父兆鳳諸生明亡號哭不食翦髮爲頭陀隱居翠微峯是冬竄離之乾遂名其堂爲易堂旋卒禧兒時嗜古論史斬斬見識讓年十一補縣學生與兄際瑞弟禮及南昌彭士望林時益同邑李騰蛟邱維屏彭任曾燦

等九人爲易堂學皆躬耕自食切劘讀書三魏之名徧海內禮束身砥行才學尤高門前有池顏其居曰勺庭學者稱勺庭先生爲人形幹修頤目光射人少善病參朮不去口性仁厚寬以接物不記人過與人以誠雖見欺怡如也然多奇氣論事每縱橫排累倒注不窮事會盤錯指畫灼有經緯思患豫防見幾於蚤懸策而後驗者十嘗八九流賊起承平久人不知兵且謂寇遠猝難及禮獨憂之移家山中山距城四十里四面削起百餘丈中徑圻自山根至頂若斧劈然緣圻鑿磴道梯而登因置閘爲守望士友稍稍依之後數年甯都被寇翠微峯獨完喜讀史尤好左氏傳及蘇洵文其爲文凌厲雄傑遇忠孝節烈事則益感激摹畫淋漓年四十乃出遊於蘇州交徐枋金俊明杭州交汪灝乍浦交李天植常熟交顧祖禹常州交惲日初楊瑀方外交樂地橋木皆遺民也當是時南豐謝文洵講學程山星子宋之盛講學醫山弟子著錄者皆數十百人與易堂相應和易堂獨以古人實學爲歸而風氣之振由禮爲之領袖僧無可譬至山中歎曰易堂真氣天下無兩矣無可明檢討方以智也友人亡其孤不能自

存禧撫教安業之凡戚友有難進之言或處人骨肉間禧批卻導愆一言輒解其紛或訝之禧曰吾每遇難言事必積誠累時待其精神與相貫注夫然後言康熙十七年詔舉博學鴻儒禧以疾辭有司催就道不得已舁疾至南昌就醫巡撫昇驗之禧蒙被臥稱疾篤乃放歸後二年卒年五十七妻謝氏絕食殉著有文集二十二卷目錄三卷詩八卷左傳經世十卷際瑞原名祥字善伯禧兄明亡後禧禮並謝諸生際瑞歎曰吾爲長子祖宗祠墓父母尸饗將誰責乎遂出就試順治十七年歲貢生甯都民亂贛軍進討索饗於山砦際瑞身冒險阻往來任其事屢瀕於死際瑞重信義翠微峯諸隱者賢族戚倚際瑞爲安危者三十餘年康熙十六年滇將韓大任踞贛當事議撫之大任曰非魏際瑞至吾不信也時際瑞館總鎮哲爾肯所遂遣之家人泣勸毋往際瑞曰此鄉邦宗族所關也吾不行恐禍及行而無成吾自當之遂往而入營官兵遽從東路急攻大任疑竇已因拘留之大任變計走降閩際瑞遂遇害年五十八子世傑殉焉際瑞篤治古文喜漆園太史公書著有文集十卷五雜俎五卷禮字和公禧弟



少魯鈍受業於禱禱嘗嘗之禮弗憾曰兄固愛弟也禱喜過望方九歲父將析產持一田券踣踏曰與祥則禮損矣奈何禮適在旁應聲曰任損我毋損伯兄父笑曰是固魯鈍者耶禮寡言急然諾喜任難事以鬱鬱不得志乃益事遠遊所至必交其賢豪物色窮巖遺佚之士年五十倦遊返於翠微左幹之巔構屋五楹是時伯叔踵逝石閣勾庭久虛無人諸子各散處不復居易堂禮獨身率妻子居十七年未他徙卒年六十六著有詩文集十六卷子世倣世儼世倣字昭士生二十餘月母口授九歌輒能成誦稍長從仲父禱讀性狷急勇於任事禱嘗謂其文一如其人鋒銳所及往往有沒羽之力以多病不應試徧遊燕楚吳越一至嶺南適王士禎使粵見所作願折節與交著有耕廡文稿十卷世儼字敬士善病如其兄然不廢翰墨與世傑世倣時稱小三魏著有爲谷文稿八卷李騰蛟字咸齋亦甯都人諸生於易堂中年最長諸子皆兄事之嚴敬無敢數後居三巘峰以經學教授著周易贖言年六十卒邱維屏字邦士甯都人三魏姊婿也明諸生爲人高簡率穆讀書多元悟禱嘗從之學晚爲秣數易學

及泰西算法僧無可與布算退語人曰此神人也彭士望與維屏交三十餘年未嘗見其毀一人然維屏獨推服禧嘗貽禧書曰拒諫飾非者大惡也不拒諫而嘗自拒諫不飾非而嘗自飾非尤惡之惡也足下敢於自信自處有故而持之以堅拒諫飾非蓋有如此者禧得之痛服維屏教授弟子手批口講日夜不輟業康熙十八年卒年六十六垂殛示子曰食有菜飯穿可補衣無譏戾行堪句讀師士望服其言著有周易勛說十二卷松下集十二卷邦士文集十八卷竹燦字青藜亦甯都人給事中應遴仲子歲乙酉楊廷麟竭力保南贛應遴以閩嶠山澤間有衆十萬命燦往撫之既行而應遴病卒贛亦破乃解散尋祝髮爲僧游閩浙兩廣間大母及母念燦成疾乃歸甯都以大母命受室築六松草堂躬耕不出者數年後僑居吳下二十餘年客游燕市以卒著有六松草堂文集西庵草堂詩集林時益本明宗室名議濤字確齋南昌人與彭士望同里兩人謀居士望與魏禧一見定交極言金精諸山可爲嶺北耕種處乃攜家偕士望往僑居十餘年與魏氏昆弟相講習康熙七年詔明故宗室子孫衆多竄伏

山林者還田廬復姓氏時益久客宦都弗樂歸卜居冠石結廬傭田非其力不食冠石宜茶時益以憲製之香味擬陽美所謂林茶者也晚好禪悅著有冠石詩集五卷確齋文集梁份字質人南豐人少從彭士望魏禧遊講經世之學工古文辭嘗隻身遊萬里西盡武威張掖南極黔滇徧歷燕趙秦晉齊魏之城覽山川形勢訪古今成敗得失遐荒軼事一發之於文方苞王源皆重之其論山海關謂關自明洪武間始設陷置臨榆於西唐爲榆關東北古長城燕秦所築距關遠皆不足輕重金之伐遼自取邊民始李自成席卷神京敗石河而失之天之廢興人之成敗而決於山海一隅荒榛千百年之上偏重於三百年間天下定則山海安山海困則天下舉困其安危之重如此生平以未遊山海爲憾爲人樸摯強毅守窮約至老不少挫卒年八十九著有懷葛堂文集十五卷西陲今略八卷

侯方域字朝宗商邱人父恂明戶部尙書季父恪官祭酒皆以東林忤閣黨方域師倪元璐性豪邁不羈爲文有奇氣時太倉張溥主盟復社青浦陳子龍主

盟幾社咸推重方域海內名士爭與之交方恂之督師援汴也方域進曰大人受詔討賊廟堂議論多牽制今宜破文法取賜劍誅一甲科守令之不應徵辦者而晉帥許定國師噪亟斬以徇如此則威立軍事辦然後渡河收中原土寨團結之衆以合左良玉於襄陽約陝督孫傳庭犄角並進則汴圍不救自解恂叱其跋扈不用趣遣之歸方域既負才無所試一放意聲伎流連秦淮間閹黨阮大鍼時亦屏居金陵謀復用諸名士共檄大鍼罪作留都防亂揭宜興陳貞慧貴池吳應箕二人主之大鍼知方域與二人善私念因侯生以交於二人事當已乃屬其客來結驩方域覺之卒謝客大鍼恨次骨已而驟柄用將盡殺黨人捕貞慧下獄方域夜走依鎮帥高傑得免順治八年出應鄉試中式副榜十一年卒年三十七方域健於文與魏禧汪琬齊名號國初三家有壯悔堂集同時江西以文名者南昌王猷定新建陳宏緒徐士溥歐陽斌元猷定字于一選拔貢生父時熙進士官太僕卿名在東林猷定好奇有辯口文亦如之著四照堂集宏緒字士業父道亨進士官兵部尙書疏救楊漣罷歸藏書萬卷宏緒不

仕輯宋遺民錄以見志有石莊集士溥字巨源父良彥進士忤崔魏削籍戍清浪深陽陳名夏聞士溥善古文手書招之拒不納有榆溪集斌元字憲萬嘗爲南司馬呂大器草奏劾馬士英二十四大罪又佐史可法幕府有文集十二卷申涵光字和孟號鳧盟永年人明太僕寺丞佳允子年十五補諸生文名藉藉顧不屑爲舉子業日與諸同志論文立社載酒豪遊爲樂萬歷六年亂起議城守出家資四百金錢二十萬犒士甲申奉母避亂西山誅茅廣羊絕頂與鉅鹿楊思聖雞澤殷岳殷淵定患難交京師破佳允殉國難涵光痛絕復蘇因渡江而南謁陳子龍夏允彝徐石麟諸名宿爲父志傳歸里事親課弟足跡絕城市日與殷岳及同里張蓋相往來酬和人號爲廣平三君清初詔訪明死難諸臣柏鄉魏裔介上褒忠疏列佳允名格於部議涵光徒跣赴京師踣泥水中幾瀕於死麻衣經帶號哭東華道上觀者皆泣裔介再疏爭之卒與祀卹如例一時士大夫高其行皆傾心納交宴遊贈答無虛日涵光爲詩吞吐衆流納之鑑治一以少陵爲宗而出入於高岑王孟諸家嘗謂詩以道性情性情之真者可

以格帝天泣神鬼若專事附會寸寸而效之則啼笑皆僞不能動一人矣尙書  
王士禎稱涵光開河朔詩派學士熊伯龍謂今世詩人吾甘爲之下者是盟一  
人而已嘗謁奇逢執弟子禮奇逢恨得之晚以聖賢相敦勉自是始聞天人性  
命之旨究心理學不復爲詩順治十七年詔郡縣舉孝行有司以涵光應力辭  
之再舉隱逸之士堅辭不就嘗自悔爲名累謝絕交遊晚年取諸儒語錄听夕  
研究作性習圖義利說及荆園小語進語諸書嘗曰主靜不如主敬敬自靜也  
朱陸同適於道朱由大路雖遲而穩陸由便徑似捷而危在人自擇耳奇逢謂  
其苦心積慮閱歷深而動忍熟裔介則讚之曰年少文壇老來理路聖賢之所  
謂博文而約禮也其推重如此康熙十六年卒年五十九涵光又解琴理書法  
顏魯公尤工漢隸間作山水木石落落有雅致著有聽山詩集八卷文集四卷  
說杜一卷蓋字覆與明亡後謝諸生悲吟侘傺遂成狂疾嘗遊齊晉楚豫間歸  
自閉土室中雖妻子不得見唯涵光岳至則延入談甚洽其詩哀憤過情恆自  
毀其稿卒後涵光爲刊遺詩曰柿葉集岳字宗山鷄澤舉人京師陷入西山與

其弟淵謀舉義事洩淵被害岳匡涵光家得免其爲詩自魏晉以下屏不觀尤不喜律詩所作唯古體莽莽然肖其爲人有留耕堂集

吳嘉紀字賓賢泰州人布衣家安豐鹽場之東洶地濱海無交遊自名所居曰陋軒貧甚雖豐歲常乏食獨喜吟詩晨夕嘯詠自適不交當世郡人汪楫孫枝蔚與友善時稱道之遂爲王士禎所知尤賞其五言清冷古淡雪夜酌酒爲之序馳使三百里致之嘉紀因買舟至揚州謁謝定交由是四方知名士爭與之倡和嘉紀工爲危苦嚴冷之詞嘗撰今樂府淒急幽奧能變通陳迹自爲一家所著陋軒集多散佚友人復裒集之爲四卷其詩風骨頗道連思亦復剗刻由所遭不偶每多怨咽之音而篤行潛修特爲一時推重云徐波字元歎吳縣人少任俠明亡後居天池構落木菴以祜禪終詩多感喟虞山錢謙益與之善贈以詩頗推重之有證簫堂染香菴等集

錢謙益字受之常熟人明萬曆中進士授編修博學工詞章名隸東林黨天啓中御史陳以瑞劾罷之崇禎元年起官不數月至禮部侍郎會推閣臣謙益慮

尙書溫體仁侍郎周延儒竝推則名出己上謀沮之體仁追論謙益典試浙江取錢千秋關節事予杖論贖體仁復甯常熟人張漢儒許謙益貪肆不法謙益求救於司禮太監曹化淳刑斃漢儒體仁引疾去謙益亦削籍歸流賊陷京師明臣議立君江寧謙益陰推戴潞王與馬士英議不合已而福王立懼得罪上書誦士英功士英引爲禮部尙書復力薦闕黨阮大鍼等大鍼遂爲兵部侍郎順治三年豫親王多鐸定江南謙益迎降命以禮部侍郎管秘書院事馮銓充修明史館正總裁而謙益副之俄乞歸五年鳳陽巡撫陳之龍獲黃毓祺謙益坐與交通詔總督馬國柱逮訊謙益訴辨國柱遂以謙益毓祺素非相識定讞得放還以著述自娛越十年卒謙益爲文博瞻諳悉朝典詩尤擅其勝明季王李號稱復古文體日下謙益起而力振之家富藏書晚歲絳雲樓火惟一佛像不燼遂歸心釋教著楞嚴經蒙鈔其自爲詩文曰牧齋集曰初學集有學集乾隆三十四年詔燬板然傳本至今不絕惟鼎孳字孝升合肥人明崇禎七年進士授兵科給事中李自成陷都城以鼎孳爲直指使巡視北城及睿親王至遂



迎降授吏科給事中改禮科遷太常寺少卿順治三年丁父憂請賜卹典給事中孫垣齡疏言孽辱身流賊蒙朝廷擢用曾不聞夙夜在公惟飲酒醉歌俳優角逐聞訃仍復歌飲留連冀邀非分之典虧行滅倫莫此爲甚部議降二級尋遇恩詔獲免累遷左都御史先是大學士馮銓被劾睿親王集科道質訊鼎孽斥銓閹黨爲忠賢義兒銓曰何如逆賊御史鼎孽以魏徵歸順太宗自解王笑曰惟無瑕者可以戮人奈何以閹賊擬太宗遂罷不問坐事降八級調用補上林苑丞旋能康熙初起左都御史遷刑部尙書卒諡端毅乾隆三十四年詔削其諡鼎孽天才宏肆千言立就世祖在禁中見其文歎曰眞才子也嘗兩典會試汲引英雋如不及朱彝尊陳維崧遊京師貧甚資給之傅山閻爾梅陷獄皆賴其力得免臨歿以徐鉉屬梁清標曰負才如虹亭可使之不成名耶鉉後以清標薦試鴻博入史館自謙益卒後在朝有文藻負士林之望者推鼎孽云著有定山堂集

吳偉業字駿公太倉人明崇禎四年進士授編修充東宮講讀官再遷左庶子

弘光時授少詹事乞假歸順治九年用兩江總督馬國柱薦詔至京侍郎係承澤大學士馮銓相繼論薦授秘書院侍講充修太祖太宗聖訓纂修官十三年遷祭酒丁母憂歸康熙十年卒偉業學問博瞻或從質經史疑義及朝章國故無不洞悉原委詩文工麗蔚爲一時之冠不自標榜性至孝生際鼎革有親在不能不依違顧戀俯仰身世每自傷也臨歿顧言吾一生遭際萬事憂危無一時一境不歷艱苦死後歛以僧裝葬我鄧尉靈岩之側墳前立一圓石題曰詩人吳梅村之墓勿起祠堂勿乞銘聞其言者皆悲之著有春秋地理志氏族志綏寇紀略及梅村集曹溶字寥躬嘉興人明崇禎十年進士官御史清定京師仍原職尋授順天學政疏薦明進士王崇簡等五人又請旌殉節明大學士范景文尙書倪元璐等二十八人孝子徐基義士王良翰等及節婦十餘人試竣擢太僕寺少卿坐前學政任內失察降二級久之稍遷左通政上言通政之官職在納言請嗣後凡遇挾私違例章疏卽予駁還仍許隨事建議又言王師入關各處駐兵乃一時權宜今當歸併於盜賊出沒險阻之地則兵不患少其閒

散無事之兵遇缺勿補遇調即遣則餉不虛糜且當裁提鎮增副將以專責成又言諸司職掌無成書請以近年奉旨通行者參之前朝會典編爲簡明則例以重官守擢左副都御史疏請時御使殿召大臣入對賜筆札以辨其才識有切中利弊者即飭力行勿概下部議帝並嘉納擢戶部侍郎出爲廣東布政使降山西陽和道康熙初裁缺歸里十八年舉鴻博丁憂未赴學士徐元文薦修明史又數年卒有倦圃詩集

宋琬字玉叔萊陽人父應亨明天啟中進士令清豐有惠政民爲立祠崇禎末殉節贈太僕卿琬少能詩有才名順治四年進士授戶部主事累遷吏部郎中出爲隴西道過清豐民遮至應亨祠款留竟日述往事至泣下琬益自刻厲期不墜先緒調永平道又調寧紹台道皆有績十八年擢按察使時登州于七爲亂琬同族子懷宿憾因告變誣琬與于七通立逮下獄并繫妻子逾三載下督撫外訊巡撫蔣國柱白其誣康熙三年放歸十一年有詔起用授四川按察使明年入覲家屬留官所值吳三桂叛成都陷聞變驚悸卒始琬官京師與嚴沆

施閏章丁樹輩酬倡有燕臺七子之目其詩格合聲諧明靚溫潤既構難時作  
淒清激宕之調而亦不戾於和王士禛點定其集爲三十卷嘗舉閏章相況目  
爲南施北宋歿後詩散佚族孫邦憲綴輯之爲六卷沈字子餐餘杭人順治十  
二年進士官至戶部侍郎性退讓或譏彈其詩輒應時改定有臬園集

施閏章字尙白號愚山宣城人祖宏猷以儒學著子姓傳業江南言家法者推  
施氏閏章少孤事叔父如父從沈壽民遊博綜羣籍善詩古文辭順治六年進  
士授刑部主事以員外郎試高等撫山東學政崇雅黜浮有冰鑿之譽秩滿遷  
江西參議分守湖西道屬郡殘破多盜徧歷山谷撫循之人呼爲施佛子嘗作  
彈子嶺大阮歎等篇告長吏讀者皆曰今之元道州也尤崇獎風教所至輒葺  
書院會講常數百人新淦民兄弟忿戾不睦一日聞講禮讓孝弟之言遂相持  
哭詣塔下服罪峽江忠虎製文祝之俄有虎墮深壑患遂絕歲旱禱雨輒應康  
熙初裁缺歸民留之不得乃釀金創龍岡書院祀之初閏章駐臨江有清江環  
城下民過者咸曰是江似使君因改名使君江及是傾城送江上又送至湖以

官舫輕民爭買石膏載之乃得渡十八年召試泃博授翰林院侍講纂修明史  
典試河南二十二年轉侍讀尋病卒閔章之學以體仁爲本置義田贍族好扶  
掖後進爲文意樸而氣靜詩與宋琬齊名王士禛愛其五言詩爲作摘句圖士  
禛門人問詩法於閔章閔章曰阮亭如華嚴樓閣彈指即見予則不然如作室  
者領壁木石一一就平地築起論者皆謂其尤著有學餘堂集矩齋雜記蠮齋  
詩話都八十餘卷閔章與同邑高詠友善皆工詩主東南壇坫數十年時號宣  
城體詠字阮懷幼稱聖童祖維岳知興國州清介無長物詠食貧厲學屢顯名  
場年近六十始貢入太學詞科之舉詠與焉授檢討閔章稱其詩優入古人兼  
工書畫有遺山堂若巖堂集時同舉鴻博又有秦州鄧漢儀字孝威以年老授  
中書舍人亦工詩遊跡所至輒以名集逐年編紀凡七集詩家咸推重之

王士禛字子底濟南新城人少工文章清介有守弟士祐士禛從之學詩士禛  
遂爲詩家大宗官尙書自有傳士禛順治九年進士投牒改官選萊州府教授  
遷國子監助教擢吏部主事康熙二年以員外郎典試河南磨勘呈吏議下獄

久之得雪免歸居數年起原官學士張貞生御史李棠先後建言獲咎力直之人以爲難尋又免歸母喪以毀卒年四十有八其文去雕飾詩尤閒澹幽肆有西樵十笏山房諸集士祐字子測十歲時客或疑焦竑字弱侯何耶坐客未對卽應聲曰此出考工記竑其幅廣以爲之弱也咸驚其夙慧康熙初第進士未仕卒士禎輯其詩爲古鉢山人遺集當是時山左詩人王氏兄弟外有田雯顏光敏曹貞吉王萃張篤慶徐夜皆知名雯字紫綸號山蘆德州人康熙三年進士授中書先是中書以贊郎充是年始改用進士遂爲例累遷工部郎中督江南學政所取士多異才每按試從兩騾二僕隨之戒有司勿供張授湖廣督糧道遷光祿卿巡撫江寧調貴州時苗狃猖獗粵督議會勦變謂制苗之法犯則治之否則防之而已無庸動衆勞民也議遂寢丁憂起補刑部侍郎調戶部以疾歸康熙中士禎負海內重名其論詩主風調雯負其縱橫排累之氣欲以奇麗抗之有古懽堂集貞吉字升六安邱人與雯同年進士禮部郎中詩格道練有實庵詩略兼工倚聲吳綺選名家詞推爲壓卷光敏字遜甫曲阜人顏子六

十七世孫也康熙六年進士除國史院中書舍人帝幸大學加恩四氏子孫授禮部主事歷吏部郎中其爲詩秀逸深厚出入錢劉吳江計東謂足以鼓吹休明雅善鼓琴精騎射蹋鞠嘗西登太華循伊闕南浮江淮觀濤錢塘派三衢所至輒命工爲圖得金石文恆懸之屋壁有樂圃集舊雨堂集萃字秋史歷城人少落拓不偶人目爲狂斐見其詩爲延譽嘗賦黃葉句絕工人稱爲王黃葉康熙四十五年進士當爲令以母老改成山衛教授閉門耽吟介節彌著有二十四泉草堂集篤慶字歷久淄川人拔貢生早受知施閏章會徵鴻博有欲薦之者辭不應詩以盛唐爲宗有崑崙山房集夜字東凝新城人本名元善舉鴻博不赴有詩集

陳恭尹字元孝順德人父邦彥明末殉國難贈尙書恭尹少孤能爲詩習聞忠孝大節棄家出游賦姑蘇懷古諸篇傾動一時留閩浙者七年一日父友遇諸塗責之曰子不歸葬奈何徒欲一死塞責耶恭尹泣謝之乃歸既葬父增城遂渡銅鼓洋訪故人於海外久之歸主何衡家與陶繇梁無技及衡弟絳相砥礪

世稱北田五子已復游贛州轉泛洞庭再游金陵至汴梁北渡黃河徘徊大行之下於是南歸築室羊城之南以詩文自娛自稱羅浮布衣恭尹修髯偉貌氣幹沈深其爲詩激昂頓挫足以發其哀怨之思自言平生文辭多取諸胸臆僕僕道塗稽古未遑也卒年七十一著獨漉堂集王隼取恭尹詩合屈大均梁佩蘭共刻之爲嶺南三家集大均字介子番禺人初名紹隆遇變爲僧中年返初服工詩高渾兀莽有翁山詩文集佩蘭字芝五南海人童時日記數千言順治十四年鄉試第一又三十一年始成進士年六十矣佩蘭夙負詩名旣選庶吉士館中推爲祭酒不一年假歸里居十五載會韶飭詞臣就職復入都逾月散館以不習國書罷歸結蘭湖社與同邑程可則番禺王邦畿方殿元及恭尹等稱嶺南七子有六瑩堂集可則字周量順治九年會試第一以磨勘停殿試歸益恣探經史十七年始應闈試授內閣中書累遷兵部郎中出知桂林府以敏幹稱其官都下與宋琬施閏章王士禛士禛陳廷敬沈荃曹爾堪輩爲文酒之會吳之振合刻八家詩選可則詩曰海日堂集殿元字蒙章康熙三年進士歷



知剡城江寧等縣置祭田以贍兄弟而自携長子還次子朝僑寓蘇州父子皆有詩名所稱嶺南七子并其二子數之也殿元著九谷集還靈州集朝勺園集佩蘭之友又有南海吳文煒字山帶十歲工詩兼善繪事詩初效長吉體務爲險語取快康熙三十二年舉人計偕卒於旅含有金茅山堂集恭尹爲之序王隼字蒲衣番禺人父邦畿明副貢生隱居羅浮嶺南七子之一也有耳鳴集華七歲能詩慕道術早歲棄家入丹霞尋入匡廬居太乙峯六七年始歸性喜琵琶終日理書卷生事窘不顧惟取琵琶彈之琵琶聲急即其窘益甚著大樽堂集妻潘女瑤湘竝工詩

馮班字定遠常熟人淹雅善持論顧性不諧俗說詩力觝嚴羽尤不取江西宗派出入義山牧之飛卿之間書四體皆精著鈍吟集趙執信於近代文家少許可者見班所著獨折服至具衣冠拜之嘗謁其墓寫私淑門人刺焚冢前其爲名流所傾仰類此宗元鼎字定九江都人七歲詠梅遠近傳誦其句堂有古梅一株人謂之宗郎梅性狷而孝釜飯屢空未嘗以貧告人康熙初貢太學銓注

州同知未仕卒元鼎與從弟元豫觀從子之瑾之瑜皆工詩有廣陵五宗之目劉體仁字公猷潁州人順治中進士有家難棄官從孫奇逢講學後官考功郎中體仁喜作畫鑒識甚精又工鼓琴與汪琬王士禎友善著七頌堂集士禎稱其詩似孟東野又言今日善學才調集者無如元鼎學西崑體者無如吳父父字修齡原名喬亦常熟人也著圍鐘詩話云意喻則米炊而爲飯者文醜而爲酒者詩乎又曰詩之中須有人在執信歎爲知言

胡承諾字君信天門人崇禎時舉人明亡後隱居不仕臥天門巾柘間順治十二年部銓縣職康熙五年檄徵入都六年至京師未幾告歸構石莊於西村窮年誦讀著釋志二十餘萬言釋志者釋己所志也原本道德切近人事爲有體有用之學其吏治篇曰古之人不敢輕言變法也必有明哲之德於精粗之理無所不昭不獨精者爲之地即粗者亦爲之地有和悅之氣於異同之見無所不容不獨同者樂其然即異者亦樂其然後可奪其久安之法授以更新之制而民不驚顧不謹譁也租庸篇曰欲富國者當使君民之力皆常有餘民之

餘力生於君之約取君之餘力生於民之各足他篇準此承諾自擬其書於徐幹中論顏氏家訓或頗譏其掇拾羣言未能如古人自成一家之說然大體必軌於正又有說書錄則鱗雜細碎殆繹志取材之餘矣二十六年卒年七十五同時篤志撰述其學與承諾相上下者又有賀貽孫字子翼永新人唐甄字鑄萬達州人貽孫九歲能屬文明季社事盛行貽孫與萬茂先陳士業徐巨源曾堯臣輩結社豫章及明亡遂不出順治初學使者慕其名特列貢榜避不就巡按御史笄重光欲舉應鴻博書至貽孫傲然曰吾逃世而不逃名名之累人實甚吾將從此逝矣乃剪髮衣緇結茅深山無復能蹤跡之者晚年窮益甚著有易觸詩觸詩後騷復又著水田居激書激書者備名物以寄興紀逸事以垂勸援古鑒今錯綜比類言之不足故長言之長言之不足故危悚惕厲必暢所欲言而後已激濁揚清始自貴因終於空明凡四十一篇甄性至孝父喪獨棲殯室三年以世亂不克還葬遂葬父虎邱順治十四年舉人選長子令下車即導民樹桑凡八十萬本民利賴焉未幾坐逃人誣誤去官就居吳市炊烟屢絕至

采枸杞葉爲食衣敗絮著述不輟始志在權衡天下作衡書後以連蹇不遇更  
名潛書分上下篇上篇論學始辨儒終博觀凡五十篇下篇論政始尚治終潛  
存凡四十七篇上觀天道下察人事遠正古跡近度今宜根於心而致之行非  
虛言也甯都魏禧見而歎之曰是周秦之書也今猶有此人乎卒年七十五

阿什坦字金龍完顏氏滿洲正白旗人順治九年進士授刑科給事中初繙譯  
大學中庸孝經諸書詔刊行阿什坦上言學者宜以聖賢爲期經史爲導此外  
無益雜書當屏絕又請嚴旗人男女之別定部院九品之制俱報可康熙初罷  
職家居鰲拜專政欲令一見終不往嗣以薦起聖祖召問節用愛人對曰節用  
莫要於寡欲愛人莫先於用賢聖祖顧左右曰此我朝大儒也著有大學中庸  
講義及奏稿係留保以掌院學士充明史總裁附王闡生傳劉淇字武仲漢軍  
鑲白旗人弟汝舉人受知世宗時有二難之目著周易通說禹貢說助字辨略  
堂邑志衛園集金德純字素公漢軍正紅旗人著旗軍志傅澤洪字育甫漢軍  
旗人累官江南淮揚道著行水金鑑百七十五卷

汪琬字茗文長洲人少孤自奮於學銳意爲古文辭於易詩書春秋三禮喪服咸有發明性狷介深歎古今文家好名真實鮮自重特立故務爲經世有用之學其於當世人物褒譏不少寬假順治十二年進士授主事再遷刑部郎中坐累降兵馬司指揮能舉其職不以秩卑自沮任滿稍遷戶部主事民送之溢衢巷惟江寧西新關以疾假歸結廬堯峰山閉戶撰述不交世事學者稱堯峰先生以宋德宜陳廷敬薦博學鴻儒科試列一等授編修纂修明史棘棘爭議不阿在館六十日再乞病歸歸十年而卒年六十七初聖祖嘗問廷敬今世誰能爲古文者廷敬舉琬以對及琬病歸聖祖南巡駐無錫諭巡撫湯斌曰汪琬久在翰林有文譽今聞其居鄉甚清正特賜御書一軸當時榮之琬爲文原本六經疎暢類南宋諸家叙事有法公卿誌狀皆爭得琬文爲重嘗自輯詩文爲類稿續稿各數十卷又簡其尤精者屬門人林佶繕刻之

計東字甫草吳江人少負經世才自比馬周王猛遭世變著籌南五論持謁史可法可法奇之弗能用也順治十四年舉順天鄉試旋以江南奏銷案被黜嘗

從湯斌講學又從汪琬受歐曾古文義法故其爲文具有本原而一出以和平溫雅既廢不用貧無以養縱遊四方所至交其豪傑過鄴城尋明詩人謝榛葬處得之南門外二十里爲修墓立石請有司禁樵牧又憩順德逆旅念歸有光昔嘗佐郡集中有廳壁記求其遺址不得乃卽署旁廢圃中設瓣香再拜流涕而去觀者駭其狂東外若不羈內行謹事母至孝同邑友人吳兆騫流徙出關爲卹其家且以女許配其弱子大學士王熙素重東屢欲薦之未果會詔舉鴻博而東已前一年卒深悼惜焉初遊河南見商邱宋犖輒引重其後東歿二十餘年犖至江蘇巡撫爲序其遺文曰改亭集刊行之兆騫字漢槎亦十四年舉人以科場蜚語逮繫遣戍甯古塔兆騫與弟兆宜皆善屬文居塞上二十年佻儻不自聊一發之於詩已而友人顧貞觀言於納蘭成德徐乾學爲納綏遂於康熙二十年赦還著秋笈集兆宜嘗注徐庾二集韓偓詩集又注玉臺新詠才調集並行於世同邑顧我錡廩生鄂爾泰任江蘇布政試古學得士五十三人刻南邦黎獻集推我錡爲冠乾隆丙辰開辭科鄂爾泰惜我錡前卒不獲舉人

謂其遇與東同有湘南詩集

彭係適字駿係海鹽人父期生明唐王時官太僕卿死懋州長子係貽以毀卒  
係適其少子也順治十六年進士授中書素工詞章與王士禎齊名號曰彭王  
康熙十八年開博學宏儒科詔中外諸臣廣搜幽隱備禮敦勸無論已仕未仕  
徵詣闕下月餼太倉米明年三月朔召試太和殿發賦詩題各一學士院給官  
紙光祿布席賜宴體仁閣下於是天子親擢係適一等一名授編修自係適外  
其籍隸浙江者又有錢塘汪霽秀水徐嘉炎朱彝尊平湖陸柔海南沈疋仁和  
沈筠吳任臣邵遠平遂安方象瑛毛升芳蕭山毛奇齡鄞陳鴻績凡十三人江  
蘇二十三人曰上元倪燦寶應喬萊華亭王項齡吳元龍無錫秦松齡嚴繩孫  
武進周清原宜興陳維崧長洲馮勳汪琬尤侗范必英吳錢中諧儀真汪楫淮  
安邱象隨吳江潘耒徐釗太倉黃與堅常熟周慶曾山陽李鎧張鴻烈上海錢  
金甫江陰曹禾直隸五人曰大興張烈東明袁佑宛平米漢雯獲鹿崔如岳任  
邱胤埏安徽三人曰宣城施閔章高詠望江龍燮江西二人曰臨川李來泰清

江黎嵩陝西一人曰富平李因篤河南一人曰睢州湯斌山東一人曰諸城李澄中湖北一人曰黃岡曹宜剛凡五十人皆以翰林入史館其列二等者亦多知名之士稱極盛焉孫適歷官吏部侍郎充經筵講官明史久未成特命爲總裁賜專敕異數也年七十致仕歸御書松桂堂額賜之遂以名其集

朱彝尊字錫鬯秀水人明大學士國祚曾孫生有異秉書經目不遺家貧客遊南隴嶺北出雲朔東泛滄海登之罘經甌越所至叢祠荒塚破爐殘碣之文莫不搜別考證與史傳參校同異歸里約李良年周賈繆冰輩爲詩課文名益噪康熙十八年試鴻博除檢討時富平李因篤吳江潘耒無錫嚴繩孫及彝尊皆以布衣入選同修明史建議訪遺書寬期限毋效元史之迫時日辨方孝孺之友宋仲珩王孟縕鄭叔度林公輔諸人咸不及於難則知從亡致身錄謂誅九族并戮其弟子朋友爲一族不足據所謂九族者本宗一族也又言東林不皆君子異乎東林者亦不皆小人作史者未可存門戶之見以同異分邪正二十年充日講起居注官典試江南稱得士入值南書房賜紫禁城騎馬數與內廷



宴被文綺時果之資皆紀以詩旋坐私挾小胥入內寫書被劾降一級後復原官三十一年假歸聖祖南巡迎駕無錫御書研經博物額賜之當時王士禛工詩汪琬工文毛奇齡工考據獨彝尊兼有衆長著經義考日下舊聞曝書亭集又嘗選明詩綜或因入錄詩或因詩存人銓次爲最當卒年八十一子昆田亦工詩文早卒孫稻係舉乾隆丙辰鴻博能世其家彝尊所與爲詩課者李良年字武曹同邑人與兄繩遠弟符并著詩名試鴻博罷歸有秋錦山房集譚吉璉字舟石嘉興人彝尊姑之子也少遇寇以身蔽父寇舍之去後以諸生試國子監第一授宏文院撰文中書舍人出爲延安同知吳三桂叛守榆城獨完論功加一級舉應鴻博報罷遷知登州府卒有嘉樹堂集

尤侗字悔成長洲人少補諸生以貢謁選除永平推官守法不撓坐撻旗丁鑄級歸侗天才富瞻詩文多新警之思雜以諧謔每一篇出傳誦徧人口康熙十八年試鴻博列二等授檢討與修明史居三年告歸聖祖南巡至蘇州侗獻詩頌上嘉焉賜御書鶴棲堂額遷侍講初世祖於禁中覽侗詩篇以才子目之後

入翰林聖祖稱之曰老名士天下羨其榮遇侗喜汲引才雋性寬和與物無忤兄弟七人甚友愛白首如垂髫卒年八十七著西堂集鶴樓堂集凡百餘卷秦松齡字留仙無錫人順治十二年進士官檢討罷歸後舉鴻博復授檢討典江西鄉試懋左贊善以論德終松齡爲庶常召試詠鶴詩有句云高鳴常向月善舞不迎人世祖拔置第一示閣臣曰是人必有品及告歸里居二十餘年專治毛詩仿黃氏日鈔之例著毛詩日箋六卷自爲詩文曰蒼岷山人集曹禾字頌嘉江陰人康熙三年進士選鴻博授檢討官至祭酒與田雯宋犖汪懋麟顏光敏王又旦謝重輝曹貞吉丁澎葉封齊名稱詩中十子同時江西選鴻博一等者李泰來字石臺臨川人順治九年進士嘗督江南學政除蘇松常道以疾歸試詞科授侍講古文博奧詩以和雅稱有石臺集

陳維崧字其年宜興人祖于廷明左都御史父貞慧見遺逸傳維崧天才絕豔十歲代大父撰楊忠烈象贊比長侍父側每名流譙集援筆作序記千言立就瑰瑋無比皆折行輩與交補諸生久之不遇因出遊所在爭客之嘗由汴入都

與朱彝尊合刻一稿名朱陳村詞流傳至禁中蒙賜問時以爲榮逾五十始舉  
鴻博授檢討修明史在館四年病卒維崧清臞多鬚海內稱陳髯平生無疾言  
遠色友愛諸弟甚遊公卿間慎密隨事匡正故人樂近之而卒莫之狎著湖海  
樓詩集迦陵文集時汪琬於同輩少許可者獨推維崧駢體謂自唐開寶後無  
與抗矣詩雄麗沈鬱詞至千八百首之多尤前此未有也順康間以駢文稱者  
又有吳綺字園次江都人維崧導源庾信泛濫於初唐四傑故氣脈雄厚綺則  
追步李商隱才地視維崧爲弱而秀逸特甚順治十一年拔貢生薦授中書舍  
人奉詔譜楊繼盛樂府遷兵部主事即以繼盛官官之也出知湖州府有吏能  
人謂其多風力尙風節饒風趣稱爲三風太守未幾罷歸貧無田宅購廢圃以  
居有句詩文者以花木潤筆因顏其圃曰種字林著林蕙堂集詞最有名婦孺  
皆能習之以有把酒祝東風種出雙紅豆之句又稱紅豆詞人徐鉉字電發吳  
江人應鴻博授檢討會當外轉遽乞歸後起原官不就卒年七十三著南州草  
堂集本事詩又嘗刻菊莊樂府崑山葉方霽稱其綿麗幽深耐人尋繹朝鮮貢

使以兼金購之欽既工倚聲因輯詞苑叢談具有裁鑒

潘耒字次耕吳江人生而奇慧讀書十行並下自經史音韻算數及宗乘之學無不通貫康熙時以布衣試鴻博授檢討纂修明史上書總裁言要義八端宜搜采博而考證精職任分而義例一秉筆直而持論平歲月寬而卷帙簡總裁善其說令撰食貨志兼他紀傳尋充日講起居注官修實錄聖訓嘗應詔陳言謂建言古無專責梅福以南昌尉言外戚柳伉以太常博士言程元振陳東以太學生攻六賊楊繼盛以部曹劾嚴嵩本朝舊制京官並許條陳自康熙十年憲臣奏請停止凡非言官而言事爲越職夫人主明目達聰宜導之使言今乃禁之豈盛世事臣請弛其禁俾大小臣工各得獻替庶罔上行私之徒有所忌而不敢肆於此輩甚不便於國家甚便也其在外監司守令遇地方大利弊許其條奏水旱災荒州縣官得上聞如此則民間疾苦無不周知矣更請許臺諫官得風聞言事有能奮擊姦回者不次超擢以作敢言之氣二十三年甄別議起坐浮疎降調遂歸未有至性初被徵辭以母老不獲命乃行既除官三牒吏

部以獨子請終養卒格於議不果歸逮居喪哀毀骨立少受學同郡徐枋顧炎武枋歿周卹其孤孫而刻炎武所著書師門之誼甚篤焉四十二年聖祖南巡復原官大學士陳廷敬欲薦起之力辭而止平生嗜山水登高賦詠名流折服有遂初堂集又因炎武音學五書爲類音八卷炎武復古未則務窮後世之變云當時詞科以史才稱者朱彝尊汪琬吳任臣及耒爲最著又有倪燦字闇公上元人以舉人授檢討撰藝文志序與姜宸英刑法志序並推傑構書法詩格秀出一時有雁園集嚴繩孫字孫友無錫人明尚書一鵬孫六歲能作擘窠大書試日目疾作第賦一詩亦授檢討撰明史隱逸傳典試江西尋遷中允假歸有秋水集子泓曾亦善畫工詩

徐嘉炎字勝力秀水人明兵部尚書必達曾孫幼警敏強記絕人既試鴻博授檢討康熙二十年王師收滇黔嘉炎仿鐃歌鼓吹曲撰聖人出至文德舞二十四章以獻又四年元夕聖祖於南海大放燈火縱臣民使觀嘉炎復應制撰記皆稱旨嘗侍直命背誦成有一德終篇不失一字至厥德靡常數語則欽容讀

之帝爲悚異又嘗問宋元祐黨人是非嘉炎舉諸人姓名始末及先儒評隲語甚悉特賜御臨蘇軾詩一卷廷臣拜賜御書自此始也累擢內閣學士兼禮部侍郎充三朝國史及會典一統志副總裁有抱經齋集方象瑛字渭仁遂安人康熙六年進士試鴻博授編修與試蜀中尋告歸象瑛性簡靜早慧十歲作遠山淨賦驚其長老致仕家居望益重邑有大利弊則嶽嶽爭言歲省脂膏萬計邑人建思賢祠祀之著健松齋集封長白山記松窗筆乘

萬斯同字季野鄞縣人父泰生八子斯同其季也兄斯大儒林有傳性彊記八歲客坐中能背誦楊子法言後從黃宗羲遊得聞戢山劉氏學說以慎獨爲宗以讀書勵名節與同志相劘切月有會講博通諸史尤熟明代掌故康熙十七年薦鴻博辭不就初順治二年詔修明史未幾罷康熙四年又詔修之亦止十八年命徐元文爲監修取彭孫通等五十人官翰林與右庶子盧君琦等十六人同爲纂修斯同嘗病唐以後史設局分修之失以謂專家之書才雖不逮猶未至如官修者之雜亂故辭不膺選至三十二年再召王鴻緒於家命借陳廷

敬張玉書爲總裁陳任本紀張任志而鴻緒獨任列傳乃延斯同於家委以史事而武進錢名世佐之每覆審一傳曰某書某事當參校顧小史取其書第幾卷至無或爽者士大夫到門諮詢了辯如嚮嘗書抵友人自言少館某所其家有列朝實錄吾默識暗誦未敢有一言一事之遺也長遊四方輒就故家耆老求遺書考問往事旁及郡志邑乘私家撰述靡不搜討而要以實錄爲指歸蓋實錄者直載其事與言而無可增飾者也因其世以考其事覈其言而平心察之則其人本末可八九得矣然言之發或有所由事之端或有所起而其流或有所激則非他書不能具也凡實錄之難詳者吾以他書證之他書之誣且濫者吾以所得於實錄者裁之雖不敢具謂可信而是非之枉於人者蓋鮮矣昔人於宋史已病其繁蕪而吾所述將倍焉非不知簡之爲貴也吾恐後之人務博而不知所裁故先爲之極使知吾所取者有所捐而所不取必非其事與言之真而不可溢也又以馬班史皆有表而後漢三國以下無之劉知幾謂得之不爲益失之不爲損不知史之有表所以通紀傳之窮者有其人已入紀傳而

表之者有未入紀傳而牽連以表之者表立而後紀傳之文可省故表不可廢讀史而不讀表非深於史者也嘗作明開國訖唐桂功臣將相年表以備采擇其後明史至乾隆初大學士張廷玉等奉詔刊定即取鴻緒史彙爲本而增損之鴻緒彙大半出斯同手也平生淡於榮利脩脯所入輒以以調宗黨故人馮京第死義其子沒入不得歸爲餼錢贖之尤喜獎掖後進自王公以至下士無不呼曰萬先生李光地品藻人倫以謂顧寧人閩百詩及萬季野此數子者眞足備石渠顧問之選而斯同與人往還其自署則曰布衣萬某未嘗有他稱也卒年六十著歷代史表規爲宦者侯表大事年表二例又著儒林宗派名世字亮工康熙四十二年一甲進士授編修夙負文譽王士禛見其詩激賞之鴻緒聘修明史斯同任考核付名世屬辭潤色之官至侍讀坐投詩諂年羹堯奪職劉獻廷字繼莊大興人先世本吳人也其學主經世自象緯律歷音韻險塞財賦軍政以逮岐黃釋老之書無所不究習與梁谿顧培衡山王夫之南昌彭士望爲師友而復往來崑山徐乾學之門議論不隨人後萬斯同引參明史館事



顧祖禹黃儀亦引參一統志事獻廷謂諸公考古有餘實用則未也其論方輿書當於各疆域前測北極出地定簡平儀制度爲正切綫表而節氣之後先日食之分秒五星之陵犯占驗皆可推矣諸方七十二候不同世所傳者本之月令乃七國時中原之氣候與今不合則歷差爲之今宜細考南北諸方氣候取其核者詳載之然後天地相應可以察其遷變之微矣燕京吳下水皆南流故必東南風而後雨衡湘水北流故必北風而後雨諸方山水向背分合皆紀述之而風土之剛柔暨陰陽燥濕之徵可次第而求矣其論水利謂西北乃先王舊都二千餘年未聞仰給東南何則溝洫通水利修也自劉石雲擾以訖金元千餘年未知水利爲何事不爲民利乃爲民害故欲經理天下必自西北水利始矣西北水利莫詳於水經酈注雖時移勢易十猶可得六七酈氏略於東南人以此少之不知水道之當詳正在西北於是欲取二十一史關於水利農田戰守者考其所以附以諸家之說爲之疏證凡獻廷所撰著類非一人一時所能成故卒不就又嘗自謂於華嚴字母悟得聲音之道作新韻譜足窮造化之

奧證以遼人林益長之說益自信其法先立鼻音二各轉陰陽上去入之五音共十聲而不厯喉腭舌齒唇之七位故有橫轉無直送則等韻重疊之失去次定喉音四爲諸韻之宗從此得半音轉音伏音送音變喉音又以二鼻音分配之一爲東北韻宗一爲西南韻宗八韻立而四海之音可齊於是以喉音互相合得音十七喉音鼻音互相合得音十又以有餘不盡者三合之得音五共三十二音爲韻父而韻歷二十二位爲韻母橫轉各有五子而萬有不齊之聲攝於此矣同時吳父盛稱其書他所著多佚歿後弟子黃宗夏輯錄之爲廣陽雜記全祖望稱爲辭季宣王道父一流云

邵遠平字戒三仁和人康熙三年進士選庶吉士厯戶部郎中出爲江西學政擢光祿寺少卿試鴻博授侍讀至少詹事致仕歸以書史自娛於世務泊如也聖祖南巡賜御書蓬觀額因自號蓬觀子遠平高祖經邦明正德中進士刑部員外郎以建言獲罪著宏簡錄起唐迄宋附以遼金未遑及元也遠平循其例續之刊除舊史複重不雅馴者入制誥於帝紀采著作於儒林而文苑分經學

文學藝學三科十三志則分載於紀傳名曰元史類編朱彝尊稱其書非官局所能逮也別著史學辨誤京邸粵行等集同邑吳任臣字志伊志行端懃強記博聞爲顧炎武所推以精天官樂律試鴻博入翰林承修明史歷志著周禮大義禮通春秋正朔考辨山海經廣注託園詩文集而十國春秋百餘卷尤稱淹貫其後如謝啟昆之西魏書周春之西夏書陳鱣之續唐書義例皆精審非徒矜書法類史鈔也謝啟昆字蘊山南康人乾隆二十五年進士由編修簡鎮江知府後至廣西巡撫卒官營築湘灘二江之堤民利賴之又修廣西通志阮元言可爲省志法啓昆以魏書專主東魏不載西魏四主北史亦無糾正乃作西魏書十二篇周春字范兮海寧人乾隆十九年進士選岑溪令父憂去民懷其澤合前令山陽劉信嘉金壇于烜共祀之曰岑溪三賢祠重宴鹿鳴加六品銜卒年八十七撰述甚多而西夏書爲最著春同州陳鱣字仲魚強於記誦喜聚書州人吳騫拜經樓書亦富得善本互相鈔藏嘉慶改元舉孝廉方正又明年中式舉人計偕入都從錢大昕翁方綱段玉裁遊後客吳門與黃丕烈定交精

校勘之學嘗以朱梁無道李氏既系賜姓復奉天祐年號至十年立廟太原合高祖太宗懿宗昭宗爲七廟唐亡而實存焉南唐爲憲宗五代孫建王之元孫祀唐配天不失舊物尤宜大書年號以臨諸國於是撰續唐書七十卷又有論語古訓石經說經籍跋文恆言廣證諸書卒年六十五

喬萊字石林寶應人父可聘明末爲御史有聲萊康熙六年進士授內閣中書乞養歸十八年試鴻博授編修與修明史典廣西鄉試充實錄館纂修官遷侍讀時御史奏濬海口瀉積水而河道總督靳輔言其不便請於邵伯高郵間置閘洩水復築長堤抵海口束之使水勢高則趨海易廷議多主河臣言適萊入直詔問萊疏陳四不可行略謂開河築堤勢必壞隴畝毀村落不可行一淮揚地卑多積潦今取溼土投深淵上安得成不可行二築丈六之堤束水高一丈秋雨驟至勢必潰即當未潰瀦水屋廬之上豈能安枕不可行三至於七州縣之田向沒於水今更束河使高則田水豈復能涸不可行四帝是之議乃寢二十六年罷歸久之召來京旋卒萊著易侯雜采宋元諸家易說推求人事參以

古今治亂得失蓋誠齋易傳之支流詩文有應制直廬使粵歸田諸集孫億亦工詩汪楫字舟次江都人原籍休寧性伉直意氣偉然始以歲貢生署贛檢訓導應鴻博授檢討入史館言於總裁先仿宋李燾長編彙集詔諭奏議邸報之屬由是史材皆備二十一年充冊封琉球正使宣布威德瀕行不受例餽國人建卻金亭志之歸撰使琉球錄載禮儀暨山川景物又因諭祭故王入其廟默識所立主兼得琉球世續圖參之明代事實詮次爲中山沿革志出知河南府置學田嵩陽書院聘詹事耿介主講席治行爲中州最擢福建按察使遷布政使樹少工詩與三原孫枝蔚秦州吳嘉紀齊名有悔齋集觀海集同里汪懋麟字季角並有詩名時稱二汪康熙六年進士授內閣中書舉鴻博持服不與試服闋復用徐乾學薦以刑部主事入史館爲纂修官懋麟績學有幹才爲中書時楚人朱方旦挾邪說動公卿懋麟作辨道論詆之熊賜履見其文與定交及居刑曹勤於職事有武某乘車宿董之貴家之貴利其貨殺之車載而棄於道鞭馬使馳武父得車馬劉氏之門訟劉殺其子懋麟曰殺人而置其車馬於門

非理也乃微行縱其馬馬至之貴門駭躍悲鳴因收之貴一訊得實寘於法其發姦摘伏多類此懋麟從王士禎學詩而才氣橫逸視士禎爲別格有百尺梧桐閣集

陸柔字次友平湖人幼時值大軍收平湖父被執柔詣軍前乞代父軍將手詩箴示之曰兒能讀是耶吾赦汝父柔朗誦收兵四解降王縛教子三升上將臺曰此宋人贈曹武惠王詩也將軍不嗜殺即今之武惠王矣將軍喜挾與北行善育之爲議婚以先問名於楊辭歸補諸生入國學試授中書康熙六年進士官內秘院典籍再試鴻博授編修分纂明史命直南書房三十三年召試翰詹諸臣豐澤園聖祖親置第一謂曰連試詩文無出汝右者一歲七遷至內閣學士長至奏旬浹本請出矜疑二十餘人後一年告歸柔性孝友兄南雄知府世楷前卒柔教養遺孤俾成立有名於時年七十卒著雅坪詩文集奎勳字衆侯世楷子也少隨柔京師以學行爲公卿所推重顧久困諸生中康熙末年幾六十始成進士授檢討充明史纂修官旬疾歸主廣西秀峯書院奎勳篤於經學

忘飢渴寒暑著陸堂易學謂說卦一篇足該全易其詩學與明何楷詩世本古義相近尙書說惟解伏生今文二十八篇戴禮緒言糾正漢人穿鑿附會之失春秋義存錄則凡經傳子緯所載孔子語盡援爲據力主春秋非以一字褒貶奎動說經務新奇使聽者忘倦最後撰古樂發微未成而卒

龐垲字齊公任邱人生有至性七歲時父緣事被逮母每夕禱天垲即隨母泣拜無或間也稍長工爲文康熙十四年舉人試鴻博授檢討分修明史明都御史某諂附魏忠賢其裔孫私餽金勾閣黨傳諱其事勿書力拒之大考降補中書泝擢戶部郎中出知建寧府浦城民以令嚴苛激變夜焚册局殺吏胥罷市令懼而逃垲聞變即馳至浦城集士民明倫堂曉諭禍福戮一人而事定民感其德立書院祀之九仙山多盜至掠人索贖掩捕數十人境內帖然未幾告歸垲嗜吟詠與同里邊汝元以詩學相踴切其所作醇雅以自然爲宗有叢碧山房集汝元子連寶字趙珍世其家學以諸生貢成均廷試第一應乾隆元年博學鴻詞科不中選十四年復薦經學辭不赴或勸之行曰吾自審不能如漢伏

勝董仲舒安政倅取哉著有隨園集

陸圻字麗京錢塘人少與弟培培以文學志行見重於時稱曰三陸所爲詩號西陵體性穎異善思誤書嘗讀韓非子一從而咸危曰是一徙而成邑也戲令他人射覆不得惟弟堦中之平生不喜言人過有語及者輒曰吾與汝姑自淑莊鑪史禍作圻坐逮以先嘗具狀自陳事得白歎曰今幸得不死奈何不以餘年學道耶親歿遂棄家遠遊不知所終子寅成進士往來萬里尋父不得竟愾愾以死時稱其孝培死甲申之難丁澎字飛濤仁和人有雋才嗜飲一石不亂弟景鴻濛竝能文時有三丁之目澎順治十二年進士官禮部郎中嘗典河南鄭試得一卷奇之同考請置之乙澎曰此名士也榜發乃廬陽李天馥出語人曰吾以世目衡文幾失此士坐事謫居塞上五載躬自飯牛吟嘯自若所作詩多忠愛無怨誹之思有扶荔堂集先是陳子龍爲登樓社圻澎及同里柴紹炳毛先舒孫治張丹吳百朋沈謙虞黃昊等竝起世號西冷十子紹炳字虎臣在十子中文名最著持躬尤端謹有省軒集先舒字稚黃嘗從劉宗周講學其詩



音節瀏亮有七子餘風著思古堂集治字字台篤友誼陸培死以孤女託爲擇  
婚得吳任臣及立嗣又以甥女嫁焉有鑑菴集丹字綱孫美鬚髯淡靜不樂交  
遊而嗜山水其詩悲涼沈遠曰秦亭集百朋字錦雯以舉人令南和有異政百  
姓祠祀之有禊庵集謙字去矜工詩初喜溫李後乃循漢魏以窺盛唐有東江  
草堂集謙與紹炳先舒皆精韻學紹炳作古韻通先舒作韻學通指南曲正韻  
謙作東江詞韻陸圻歎曰恨孫偁周德清曾無先覺黃昊字景明十歲即善屬  
文薄柳州乞巧更作辭巧文誠者知其遠到康熙中舉人終教諭

孫枝蔚字豹人三原人少遭閹賊亂結邑里少年擊賊墮坎塹幸不死乃走江  
都習賈屢致千金輒散之既乃折節讀書僦居董相祠高不見之節王士禛官  
揚州以詩先遂定交稱莫逆焉時左贊善徐乾學方激揚士類才俊滿門枝蔚  
弗屑也以布衣舉鴻博自陳衰老乞還山遂不應試授內閣中書著澹堂集詩  
詞多激壯之音稱其高節李念慈字肥瞻涇陽人順治十五年進士以河間府  
推官改知新縣坐逋賦罷會有荆襄之役敘運餉勞再起補天門與枝蔚同舉

鴻博試不中選喜遊好吟詠有谷口山房集施閩章稱其雄爽之氣勃勃眉宇蓋秦風而兼吳楚者

丁焯字瞻汝晉江人諸生工詩有吏才順治十二年定遠大將軍濟度統師取漳州詔便宜置郡縣吏得試士幕下拔焯第一授漳平教諭遷知直隸獻縣內擢戶部主事時議稅鬪鹽焯力陳不可事得寢由郎中出爲贛南分巡道閩人佃贛者乘亂劫略號曰賊捕治之民情大洽遷湖北按察使脫重囚爲盜誣者二十餘人於獄尋坐事謫官居武昌未發武昌卒夏包子作亂曾使署巡撫以死拒東走安慶乞師巡撫楊素蘊事平降補知府雲南會素蘊移撫湖廣以焯事聞復按察職俄以疾歸焯論詩以爲詩貴合法然法勝則離貴近情然情勝則俚故其爲詩力追三唐漢魏無詭薄之失有問山集林侗字同人閩人也縣貢生喜金石卒年八十八弟佶字吉人康熙五十二年進士官中書工楷法文師汪琬詩師陳廷敬王士禛此三人集皆佶手繕付雕精雅爲世所重家多藏書徐乾學輯經解朱彝尊選明詩皆就傳鈔有樸學齋集黃任字莘田永福人

工書口辯若懸河有硯癖以舉人令四會罷官歸惟硯石壓裝詩清新刻露有  
香草齋集乾隆二十七年重宴鹿鳴卒年八十餘鄭方坤字則厚建安人雍正  
元年進士爲令邯鄲屢擢至山東兗州知府時禁人口出海抵奉天而未入籍  
者悉勒還本土方坤適知登州以爲司牧者但當嚴姦宄之防不得閉其謀生  
之路爲白大吏弛其禁調武定能盡心賑務兗州饑復移治之方坤記誦博詩  
才凌厲與兄方城齊名有蔗尾集又著經稗五代詩話全閩詩話國朝詩人小  
傳

黃與堅字廷表太倉人幼有奇慧八歲酷好唐人詩錄小本懷袖中諷誦之已  
而究心經術徧讀周秦古書性落落與人交有終始順治十六年進士後舉鴻  
博授編修遷贊善分修明史及一統志寓居委巷寂寞著書如窮愁專一之士  
有忍菴集吳偉業選婁東十子詩以與堅爲冠十子者周肇許旭王撰王據王  
吳王揆王忭王曜昇顧湄也肇詩曰東岡集旭曰秋水集撰曰三餘集據曰蘆  
中集吳爲世貞後有文藻下筆如宿構康熙十八年召試授官正字所著曰碩

圖集揆順治中進士所著曰芝廬集卞曰健菴集隴昇曰東臬集涓字伊人亦  
太倉人事母以孝聞父夢麟長於毛鄭之學涓傳其業尤工詩清麗婉約陳瑚  
以爲過元人其詩曰水鄉集

吳雯字天章蒲州人原籍遼陽父允升任蒲州學政卒官遂家焉雯少朗悟記  
覽甚博尤長於詩遊京師父執劉體仁汪琬皆激賞之王士禎目爲仙才嘗與  
葉方窩同直誦其響句方窩下直即趨訪名大噪大學士馮溥出扇索詩雯大  
書二絕句答之其坦率類是卒以不遇不悔也試鴻博不中選後居母憂以毀  
卒雯著蓮洋集詩體峻潔有其鄉人元好問之風據名山記蓮洋村在華岳下  
取以名集陶季寶應人初名激字季深以字行復去其一稱曰陶季負異才鋒  
穎踔厲遊燕趙齊魯之郊踰太行浮湘沅所至皆有詩士禎刪定其客滇南閩  
中諸詩以高岑龍標相况先是詔舉鴻博公卿爭欲薦季辭不就以布衣終有  
湖邊草堂集及舟車集

梅清字瞿山宣城人宋梅堯臣後也清英偉豁達自力於學以淹雅稱順治十

一年舉人試禮部不第朝士爭與之交王士禎徐元文尤傾倒焉詩凡數變自訂天延閣前後集年七十餘復合編罷山詩略書法仿顏真卿楊凝式畫尤盤礴多奇氣嘗作黃山圖極烟雲變幻之勝爲當時所重同族有梅庚者生後於清善八分書亦工詩畫與清齊名庚字耦長少孤承其祖鼎祚父朗中之傳益昌大之施閭章見其詩引爲忘年交康熙二十年舉人爲朱彝尊所得士性狷介客遊京師不忘投一刺士禎主禮闈庚復被黜士禎贈詩引爲恨也後知秦順縣有惠政民德之

馮景字山公錢塘人國子監生善屬文千言立就康熙時遊京師侍郎項景襄金鼎皆遣子弟從受學會營宮室求相木梁不得有請以他木易國子監彝倫堂梁者景上書尙書魏象樞極陳不可事得寢由是馮太學生之名盛傳京師大學士索額圖召欲見之謝不往歸館淮安邱象隨家垂十年宋犖撫江蘇禮致幕府或納金求爲緩頰岐卻之人益欽其品景篤師友風義與仁和汪煜湯右曾交最篤二人爲給事中多所論列亦由景數責善有以激厲之也王士禎

轉左都御史景以受知士禎冀其大有匡濟爲書諷之景雖布衣不求仕進而未嘗忘當世之務在淮安時有水患湯斌奉詔北上作書陳災狀及所以致患之由斌見書嗟賞又嘗稱其文爲不朽其著述多佚今存者解春集邵長蘅字子湘武進人十歲補諸生因事除名旋入太學工詩尤致力古文辭洵鍊雅正與景同客犖幕長蘅亦觥觥持古義無所貶損時論賢之著有青門稿

姜宸英字西溟慈谿人明太常卿應麟曾孫父曾珪諸生以孝聞宸英績學工文辭閎博雅健屢躋於有司而名達禁中聖祖目宸英及朱彝尊嚴繩孫爲海內三布衣侍讀學士葉方龜薦應鴻博後期而罷方龜總裁明史又薦充纂修食七品俸分撰刑法志極言明詔獄廷杖立枷東西廠之害辭甚愷至尙書徐乾學領一統志事設局洞庭東山疏請宸英偕行久之舉順天鄉試三十六年成進士廷對李蟠第一殿虞惇第二帝識宸英手書親拔置第三人及第授編修年七十矣明年副蟠典試順天蟠被劾遣戍宸英亦連坐事未白卒獄中宸英性孝友與人交坦夷而不阿祭酒翁叔元劾湯斌僞學遽移書責之著湛園

集葦間集書法得鍾王遺意世頗重之虞悼字贊成常熟人幼能背誦九經三史既官翰林館閣文字多出其手科場獄興虞悼諸子是科獲雋考官蟠宸英皆其同年友用是呈吏議錙紱閒居數年起大理寺寺副平反內務府殺人移獄被誣者累遷太僕寺少卿卒官著有讀詩質疑江南人刻其文曰嚴太僕集以繼明歸太僕云黃虞稷字俞邵上元人本籍晉江七歲能詩以諸生舉鴻博遭母喪不與試左都御史徐元文薦修明史又修一統志皆與宸英同家富藏書著千頃堂書目爲明史藝文志所本

性德納喇氏初名成德以避皇太子允礽嫌名改字容若滿洲正黃旗人明珠子也性德事親孝侍疾衣不解帶顏色黧黑疾愈乃復數歲即習騎射稍長工文翰康熙十四年成進士年十六聖祖以其世家子授三等侍衛再遷至一等令賦乾清門應制詩譯御製松賦皆稱旨俄疾作上將出塞避暑道中官將御醫視疾命以疾增減告遽卒年止三十一嘗奉使塞外有所宣撫卒後受撫諸部款塞上自行在遣中官祭告其眷疎如是性德鄉試出徐乾學門與從輩討

學術奮衰刻宋元人說經諸書書爲之序以自撰禮記陳氏集說補正附焉合爲通志堂經解性德善詩尤長倚聲徧涉南唐北宋諸家窮極要眇所著飲水側帽二集清新秀雋自然超逸嘗讀趙松雪自寫照詩有感即繪小象仿其衣冠坐客期許過當弗應也乾學謂之曰爾何似王逸少則大喜好賓禮士大夫與嚴繩孫顧貞觀陳維崧姜宸英諸人游貞觀友吳江吳兆騫坐科場獄成寄古塔賦金縷曲二篇寄焉性德讀之歎曰山陽思舊都尉河梁並此而三矣貞觀因力請爲兆騫謀得釋還士尤稱之貞觀字梁汾無錫人康熙十一年舉人官內閣中書工詩自定集僅五言三十餘篇清微婉篤上睇韋柳而世特傳其詞與維崧及朱彝尊稱詞家三絕清世工詞者往往以詩文兼擅獨性德爲專長仁和譚獻嘗謂爲詞人之詞性德後又得項鴻祚蔣春霖三家鼎立鴻祚字蓮生錢塘人道光十二年舉人善詞上溯溫韋下逮周密吳文英擷精華粹以自名其家屢應禮部試不第卒年三十八自序憶雲詞爲之序有曰不爲無益之事何以遺有涯之生學者誦而悲之春霖字鹿潭江陰人寄籍大興咸豐中



官東臺場鹽大使工詞時方亂離傍徨沈鬱高者直逼姜夔困於卑官孤介忤時益侘傺舟經吳江一夕暴卒春霖慕性德飲水鴻祚憶雲自署水雲樓即以名其詞

宗室文昭字子晉饒餘親王阿巴泰曾孫鎮國公百綬子辭爵讀書從王士禎遊工詩才名藉甚王式丹稱其詩以鮑謝爲胚胎而又兼綜衆有擷百家之精華其味在酸醜之外著有癡嬰居士集紫幢詩鈔又宗室以詩名者蘊端初名岳端字正子號紅蘭主人多羅安郡王岳樂子封貝子有玉池生稿博爾都字問亭號東皋漁父恪僖公拔都海子蘊端從弟封輔國將軍有問亭詩集永忠字良輔又字懼仙多羅貝勒弘明子輔國將軍有延芬室集詩體秀逸書法遒勁頗有晉人風味常不衫不履散步市衢遇奇書異籍必買之歸靡典衣絕食不顧也書誠字實之號樗仙鄭獻親王濟爾哈朗六世孫輔國將軍長恒子奉國將軍有靜虛堂集性慷慨不欲嬰世俗情年四十即託疾去官邸有餘隙地盡種蔬果手執畚鍤從事習勞以爲樂永齋字嵩山康修親王崇安子鎮國將

軍詩宗盛唐書法趙文敏晚年獨居一室不與人接詩多散佚裕瑞字思元豫通親王多鐸裔封輔國公工詩善畫通西蕃語常畫鸚鵡地圖即西洋地球圖又以佛經自唐時流入西藏近日佛藏皆出一本無可校讐乃取唐古特字譯校以復佛經唐本之舊凡數百卷著有思元齋集

趙執信字仲符益都人從祖進美官福建按察使詩名甚著執信承其家學自少即工吟詠年十九登康熙十八年進士授編修時方開鴻博科四方雄文績學者皆集輦下執信過從談讌一座盡傾朱彝尊陳維崧毛奇齡尤相引重訂爲忘年交出典山西鄉試遷右贊善二十八年坐國恤中讌飲觀劇爲言者所劾削籍歸卒年八十餘執信爲人峭峻褊衷獨服膺常熟馮班自稱私淑弟子娶王士禎甥女初頗相引重後求士禎序其詩士禎不時作遂相詬厲嘗問詩聲調於士禎士禎斬之乃歸取唐人集排比鈎稽竟得其法爲聲調譜一卷又以士禎論詩比之神龍不見首尾雲中所露一鱗一爪而已遂著談龍錄云詩以言志詩之中須有人在詩之外尙有事在意蓋詆士禎也說者謂士禎詩尙

神酌其弊也。庸執信以思路剗刻爲主，其失也。繼兩家才性不同，實足相資濟。云執信所著詩文曰：飴山堂集。當是時海內以詩名者推士禎，以文名者推汪琬。而嘉興葉燮字星期，其論文亦與琬不合。往復論難，互譏嘲焉。及琬歿，慨然曰：吾失一諍友矣。今誰復彈吾文者？取向所短汪者，悉焚之。燮父紹袁，明進士官工部主事。國亡後，爲僧燮生。四歲授以楚辭，卽成誦。康熙九年進士，選授寶應令。值三藩亂，又歲饑，民不苦累，以伉直失上官意，坐累落職。時嘉定知縣陸隴其亦被劾燮，以與隴其同罷，爲幸。性喜山水，縱游字內名勝，幾徧年七十六。猶以會稽五洩近在數百里，獨未游，爲憾。復裹纒往歸，遂疾。逾年卒。寓吳時，以吳中論詩多獵范陸皮毛，而遺其實著原詩，內外篇力破其非。吳士始而訾訾，久乃更從其說。著已畦詩文集。士禎謂其鎔鑄往昔，獨立起衰。馮廷樾字大木，德州人。康熙二十一年進士，授中書幼有奇童之目。讀書一覽輒記。尤長於詩。嘗充湖廣副考官，試畢登黃鶴樓，俯江漢之流，南望瀟湘洞庭，慨然遠想賦詩百餘篇。識者以爲騷之遺也。平生深契者惟執信，其詩孤峭亦相類。歿後散佚。

其孫德培搜輯得五百篇名馮舍人遺詩

黃儀字六鴻常熟人精輿地之學嘗以班固地志所載諸川第詳水出入其中問經歷之地備著於水經然讀者非繪圖不能了乃反覆尋究每水各爲一圖凡郡邑建置沿革山川險易皆具焉條縷分析各得其理閩若璩見之歎曰鄴道元千古後一知己也若璩嘗問儀後漢志溫縣濟水出王莽時大旱遂枯絕是河南無濟矣何鄴氏言之詳也儀曰新莽時雖枯後復見鄴氏所謂其後水流逕通津渠勢改尋梁脈水不與昔同是也杜君卿乃不信水經專憑彪志竊以彪特紀一時災變耳非謂永不截河南過也徐乾學修一統志儀與若璩胡渭顧祖禹任分纂皆地學專家儀又訂正晉書地理志兼工詩詞著有級蘭集鄭元慶字芷畦歸安人通史傳旁及金石文字李紱張伯行雅重其學欲薦於朝未得也顏魯公書湖州石柱記元慶爲之箋釋甚博贈又著湖錄百二十卷七易藥而後成自謂平生精力殫於是書平生慕鄭子真之爲人自號鄭谷口晚更治經其著書處名魚計亭著有周易集說詩序傳異同禮記集說參同官

禮經典參同家禮經與參同喪服古今異同考春王正月攷海運議

查慎行字悔餘海寧人少受學黃宗羲於經邃於易性喜作詩游覽所至輒有吟詠名聞禁中康熙三十二年舉鄉試其後聖祖東巡以大學士陳廷敬薦詔詣行在賦詩又詔隨入都直南書房尋賜進士出身選庶吉士授編修時族子昇以諭德直內廷宮監呼慎行爲老查以別之帝幸南苑捕魚賜近臣命賦詩慎行有句云笠簷簑袂平生夢臣本烟波一釣徒俄宮監傳呼烟波釣徒查翰林時以比春城寒食之韓翃云充武英殿書局校勘乞病還坐弟嗣琛庭得罪闔門就逮世宗識其端謹特許放歸田里而弟嗣琛謫道關西卒於戍所嗣琛字德尹康熙三十九年進士官至侍講性警敏數歲即解切韻諧聲詩名與慎行相埒慎行著警業堂集周易玩辭集解又補注蘇詩行於世嗣琛著查浦詩鈔音類通考昇字仲章康熙二十七年進士官少詹事詩筆清麗尤工書似董其昌有澹遠堂集

史申義字叔時江都人少工詩與同里顧闈河齊名稱維揚二妙康熙二十七

年進士授編修充雲南鄉試考官改御史禮科給事中乞病歸王士禛以風雅  
詔後進督謂申義及湯右曾足傳己衣鉢人稱王門二弟子在翰林時聖祖以  
後進詩人詢大學士陳廷敬廷敬舉申義周起渭對故又有翰苑兩詩人之目  
起渭字漁塘貴陽人康熙三十三年進士由檢討累遷詹事府詹事詩才雋逸  
尤肆力於蘇軾元好問高啟諸家貴州自明始隸版圖清詩人以起渭爲冠而  
銅仁張元臣平遠潘淳亦竝有詩名元臣字志伊康熙三十六年進士由檢討  
累遷左諭德有豆村詩鈔淳字元亮康熙五十四年進士官檢討文安陳儀與  
同榜一時咸推潘詩陳筆有橡林詩集

顧陳埈字玉停鎮洋人少有文名嘗得徐光啟歷書精求一月通其術康熙五  
十四年舉人以薦入泚凝齋修書書成議叙行人司行人時外廷送算學三百  
餘員候試聖祖親策之得七十二人陳埈爲冠又充樂館纂修雍正元年出使  
山東浙江還督通州倉三年以目疾乞歸閉門撰述四方走書幣乞文者踵至  
性耿介敦於內行居喪不飲酒食肉不處內沈起元官河南延主大梁書院引

范文正憂中掌學睢陽以勸陳埤執象山責東萊故事謝不往也乾隆元年詔起官又舉鴻博及六年設樂部復以洞曉音律宣召皆辭不赴時論高之年七十卒陳埤精字學算學樂律時稱三絕嘗造八矢注守圖說謂字學居六藝之末聲音樂也形體書也而口出耳入手運目存則皆有數焉學士惠士奇通政孫勛得其書置酒延陳埤請其說陳埤爲言經聲緯音開發收閉之旨及每矢實義一矢未發則聲不能出字有所避八矢盡而音定字死矣二人歎爲天授少與同里王時翔爲性命交並工詩婁東詩人大率宗吳偉業陳埤晚出乃自闢町畦著洗桐集抱桐集

何焯字屺瞻長洲人通經史百家之學藏書數萬卷得宋元舊槧必手加讐校粲然盈帙學者稱義門先生傳錄其說爲義門讀書記康熙四十一年直隸巡撫李光地以草澤遺才薦召入南書房明年賜舉人試禮部下第復賜進士改庶吉士仍直南書房授皇八子讀兼武英殿纂修連丁內外艱久之復以光地薦召授編修尙書徐乾學翁叔元爭延致焯尋遭讒與乾學失歡而叔元劾湯

斌焯上書請削門下籍天下快之聖祖幸熱河或以蜚語上聞還京即命收繫  
齋籍其卷冊文字帝親覽之曰是因讀書種子也無失職缺望語又見其草藁  
有手簡吳縣令卻金事益異之命還所籍書解官仍參書局六十一年卒年六  
十一帝深悼惜特贈侍講學士贈金給符傳歸喪命有司存恤其孤焯工楷法  
手所校書人爭傳寶門人著錄者四百人吳江沈彤吳縣陳景雲爲尤著景雲  
字少章博聞彊識能背誦通鑑年十七湯斌撫吳試士拔第一應京兆試不遇  
館藩邸三年以母老辭歸遂不出以諸生終少從焯游焯歿獨繫吳中文獻幾  
二十年著有讀書紀聞及綱目通鑑兩漢書三國志文選韓柳集皆有訂誤共  
三十餘卷文集四卷亦簡嚴有法子黃中字和叔諸生父子皆長史學而黃中  
尤以才略自負舉乾隆元年博學鴻詞入都上書論用人理財治兵三端大學  
士陳世倌韙其言頃之詔求骨鯁之士如古馬周陽城者世倌欲薦之謝不應  
胡天游傲睨羣士獨推服黃中示以文每發其瑕璽未嘗有忤也嘗病宋史蕪  
雜別撰紀傳表百七十卷又著國朝設法考關部督撫年表其卒也貧不能葬



或賻以金妻張氏固卻之曰奈何以貧故傷夫子義遂賣所居宅以營葬

戴名世字田有桐城人生而才辨雋逸課徒自給以制舉業發名廩生考得貢

補正藍旗教習授知縣棄去自是往來燕趙齊魯河洛吳越之間賣文爲活喜

讀太史公書考求前代奇節瑋行時時著文以自抒瀟鬱氣逸發不可控御諸

公貴人畏其口尤忌嫉之嘗遇方苞京師言曰吾非役役求有得於時也吾胸

中有書數百卷其出也自付將有異於人人然非屏居深山足衣食使身無所

累未能誘而出之也因太息別去康熙四十八年年五十七始中式會試第一

殿試一甲二名及第授編修又二年而南山集禍作先是門人尤雲鶚刻名世

所著南山集集中有與余生書稱明季三王年號又引及方孝標滇黔紀聞當

是時文字禁網嚴都御史趙申喬奏劾南山集語悖逆遂逮下獄孝標已前卒

而苞與之同宗又序南山集坐是方氏族人及凡挂名集中者皆獲罪繫獄兩

載九卿覆奏名世雲鶚俱論死親族當連坐聖祖矜全之又以大學士李光地

言省苞及其全宗申喬有清節惟興此獄獲世譏云名世爲文善敘事又著有

子遺錄紀明末桐城兵變事皆燬禁後乃始傳云